

程侍郎遺集

三





一

二

三

四

五

六

七

八

九

十

十一

十二

十三

十四

十五



程侍郎遺集

(二)

程恩澤撰

王雲五主編
叢書集成初編
程侍郎遺集
三冊

中華民國二十四年十二月初版

著者 程恩澤

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

祥

程侍郎遺集初編卷八

河南按察使嚴公神道碑銘

公諱士鉉。字震叔。又字筠亭。江蘇丹徒人。先世太學生永中。居汴。當宋靖康時。與大學錄陳東等。擊登聞鼓。請留李綱。不報。遂渡江而南。居京口。爲遷丹徒始祖。曾祖之錫。祖榮德。輕財好施。喜交魁儒碩彥。鄉里敬之。貲贈中憲大夫。父璟。晉贈中憲大夫。妣華氏。曹氏。贈恭人。公爲中憲第三子。少端靜。及長。儀度修偉。性沈毅。寡言笑。喜愠不形於色。工文辭。尤留心經世之學。公叔祖元燮。以名進士教於家。窮經治史。旁及星緯象數。公從遊。盡得其傳。乾隆丁酉科。公舉選拔。以知縣試用四川。攝秀山內江。題補墊江。將赴任。以憂去。服闋。攝天全州。攝成都。兼攝金堂。題補犍爲。攝樂山。奏調華陽。以軍功擢資州。尋擢知寧遠府事。攝夔州府事。奏擢川東道。攝布政使。攝永寧道。攝按察使。擢湖南按察使。調河南按察使。未之任。以疾去。公善折獄。任華陽時。有以貲得道職。仍充潼商。負犍商本不歸。犍商訟之。某怙勢亂鹽法。不爲屈。公讞定。褫其職。加桎梏。豪猾奪氣。又有以貲得副指揮。某利鰥叔母財。誣其與壻姦。訟諸按察使。飭公會鞠。鰥懷利刃。欲自刺于訟庭。公廉知之。訊其指姦無證。乃坐誣告者。鰥與宗人數百。伺公出。焚香泥首馬前。又富家某。賃一婢。忽逃去。婢家以謀殺控。公方集人證。研鞫時。按察使承差明招佐者。陰偵伺。日一至縣庭。公疑之。廉得招佐匿婢狀。蓋招佐傭富家。欲陷之。公帶幹役。出不意。於二鼓後排闥入。獲婢。卽禽招佐。論如法。

公發姦鋤強類如此。平反獄至多。錄其犖犖大者。公尤知兵。乾隆六十年。湖南苗疆軍興。福文襄王帥師進剿。孫文靖再督四川。駐節秀山。時公攝夔州府事。府據白帝。控瞿塘。萃水陸之險。又東縮宜昌。東北袤鄖陽。北指興安。南涉施南。古戰爭地也。公亟修水陸營堡。誅匪徒潛伏者。未幾白蓮教匪齊王氏、姚之富、張漢潮、覃加耀等起。分竄荆襄。宜施各府。在在與夔州牙錯。公亟請於孫文靖。撥權銀。集團勇。積穀練兵。爲守禦計。選健卒數十人。布所轄六邑。偵紆細。而大寧之一碗泉。開縣之周家槽。有伏寇。公會營弁疾馳掩擊殆盡。是時川中教匪尙未蔓延。故旋起旋撥滅。文靖又以巫山爲川東門戶。檄公守焉。巫山郭俯江。憑大寧河。距楚境不百里。而巴東之培石、遼箭槽、拐子坪。皆有教匪。欲攻巫山城。得則據之。不勝則奔湖北。與大股賊合。其酋曰侯光斗、李宗嵩。無何侯之宗人告變。公時出巡陪石。聞之。遣親信入山偵。卽約都司徐朝綱議剿。撫時公度賊密約已久而未發。必脇從者衆。心力未齊也。乘其未發。撫之。則不煩兵矣。語都司都司奮曰。朝綱任巫山久。與各寨居民習。當爲公往。公握其手下。拜曰。君信有膽識。某亦同往。義不獨令君勞也。各帶僱從數人。而分撥兵勇。每五里置二人。爲急遞。脫有變。卽馳歸報巫山。使登陴守。瀕行探卒旋曰。居民數萬戶。教匪三之一耳。公與都司徑入。不三十里。有冠儒冠者十餘人。迎於馬首。詢何姓。皆侯李也。曰。來者非太守與都司耶。曰。然。曰。是不可入。中有教匪數千戶。將揭竿奔湖北矣。都司曰。知之衆。曰。旣知之。何不帶兵而單騎入。都司曰。吾與太守不以教匪視吾民。奚兵爲。且爾等不聞湖南苗疆。凱旋之兵十餘萬。圍賊於巴東之黃柏山。不日盡剿。無子遺乎。彼棄其田廬墳墓妻子。欲往助。至卽授首耳。

愚甚。彼能悔教從我。我與太守能生之。衆頓首泣下曰。太守與公來。某等活矣。某等亦誤入教者。公於是拔佩刀裂短後衣一幅示之曰。所不許爾投誠而食言者。有如此衣。衆曰。首逆謀者。侯光斗。李宗嵩耳。某等願禽以獻。公卽委候補員馬鳴鑾。吳國鴻。各率兵勇往追捕。自與都司徐分歷。各教匪巢穴。宛轉曲諭。十餘日而徧。皆革心爲良民。尋獲侯光斗。李宗嵩。斬之。公下令赦悔教者。於是數千戶人歡聲若雷。嘉慶二年。川東達縣之王三槐。徐添德。川北巴州之羅其清。冉文儔等。蠶起。陝西亦然。三省連兵會剿。而賊愈熾。參贊德楞泰公。駐兵開縣之大團包。公在參贊營總糧餉。乃獻策曰。齊團練使之守。招鄉勇使之戰。參贊隨之。公招集鄉勇。一月餘得萬人。選隊長二。一爲桂公涵。一爲羅公思。舉今皆官提督。總統宜綿公。參贊德楞泰公。奏公勤力。奉旨賞帶花翎。時賊匪出沒不恆。德公屢挫之。因選勁旅。乘夏漲。爲下峽計。公馳入夔州。集兵船三百艘。載官軍。隨德公自夔門下抵宜昌。德公登岸。將整隊。忽前鋒偵報。賊匪不入。鄖陽將竄荊州。出襄陽。以齊王氏樊城人。樊城接南陽。德公恐震中州。計賊匪已過宜昌。不可追。甚憂之。公進曰。可仍由水路下荊州。因手令箭傳呼曰。兵船無散。仍載大兵下荊州。舟子皆夔人。感公舊政。均踴躍。時宜昌餉絀。不能給船值。公卽以川餉給之。剋日請德公登舟。德公喜曰。此行扼賊不使過南陽。君之功也。果及賊於荆襄。敗之。復敗賊于鄖陽。殲之。公以軍功加道銜。隨德公營至漢中府。漢中與保寧接。公調川兵及餉。遂之保寧之廣元。而土匪何四蠻刀等。欲起應賊。公禽其首。餉其餘。境內以安。大府上其事。以道員卽用。尋授川東道。仍留軍營。嘉慶十一年。陝西寧陝新兵叛。川東毗陝西省。公赴綏定籌邊。而綏定新

兵亦翻城出。欲由新寧竄巴山。公卽檄桂公涵迎擊盡淨。時事起倉卒。公籌畫凡十晝夜不寐。公自乙卯兵興。迄辛酉功竣。凡七年在戎行。運用神速。知山川夸險。故所策多勝筭。恆出諸將帥先。耐辛苦。尤儉約。食等士卒。臥一敵穹廬。不避燥溼寒暑。卒以是致顛眩疾。大兵之後。川北一帶。州縣有未治城郭者。方伯方公積議開南江老林。招商出售。可得城郭貲。請於常齡公。檄公往勘。公按行一閱月。致書方伯。以五不可阻之。大旨謂南江山谷阻深。毗陝西漢中。爲南棧別支。賊匪初平。人宜散不宜聚。聚則易因緣爲姦。而兩省墾荒之人。不下數十萬。皆衣食此山。一旦設廠伐木。是奪其利。又老林爲縣屏蔽。伐之恐地坼傷。方公得書。白制府罷之。未幾陝西南山大饑。木廠倡亂。人皆服公先見。襄平相國蔣公攸銛。時督四川。知公練達。詢以川省情狀。公條吏治。兵政。邊防。盜賊。四事。大約謂蜀中州縣。起科目者半。起投效者半。易分門戶角技能。又瘡痍之後。弱宜撫。強宜戢。當判其才之寬猛。使各盡其長。去其短。拘常例輪委。則上才屈。搢地方肥瘠。則私門開。又軍功超遷。往往起微末。洊至方面。流品至雜。尤宜審擇。蜀中兵久戰。故兵強。兵強則易叛。糧帑不可移動。訓練不可廢弛。以勇將兵。以誠將將。則百萬統于一。邊境番夸之黠者。北曰果羅。克三部。南曰瞻對三部。又建昌道所屬各州縣。永寧道。敘州府。馬邊。峽邊。雷波等處。民番交錯。易侵占。啓釁。盜賊之尤者。曰咽匪。咽匪有專律。格殺勿論。其民浮囂易動。故剽掠作姦。不獨莠民。富室豪強亦爲之。且匿猾與通賄。尙巫信祆。好結盟黨。皆教匪之漸。公所陳皆遠大。蔣公一一施行。蜀以大治。始公以知縣辦西藏軍務。大員某僂從入局。索夫馬勢甚張。公立擒治。論如法。嘉慶四年。川督勒公被逮。以某公代。某

公至。將興大獄。公從容陳白。以情理折之。其事遂解。人謂公善用剛柔有如此。公以嘉慶二十四年。疾劇在告。道光六年。就養于楚南官舍。八年夏。感熱疾。秋不起。享年八十有三。夫人趙氏。封恭人。晉淑人。先公十有一年卒。子三。長學瀛。候選鹽場大使。爲公兄士銓後。前卒。次學淦。舉人。署湖南耒陽縣知縣。三學澄。候選縣丞。前卒。孫六。榕。廷。枋。樽。榆。標。承曾。以道光十年正月初七日。葬公於城西曹王山枝之徐灣原。趙淑人附焉。記澤官黔時。識公門下士。糜方伯奇瑜。方伯稱公德量智術不去口。恆奉以爲法。尋澤移官楚南。以年家子禮拜公。公時年過八十。言語姍姍。猶未釋恭。去歲從蔣襄平夫子遊。夫子譽公。一如方伯所言。嗚呼。魁儒長者。芳烈之昭著如是。是可銘也已。銘曰。

其量淵淵。其才磐磐。洞深察微。秉經達權。市朝原野。皆天所棄。戰人之命。匪仁曷恃。五過有疵。弱肉餒強。公折鉅豪。剗狼屺。用武之國。死若薙草。公起白骨。授以文祿。或摧機牙。或爭須臾。騰趁飛行。如風御虛。燒銷馬卻。雍容坐論。東井有絡。西川如鏡。冊載服官。七年枕戈。心燔欲枯。筋體猶磨。屢筦億鎰。退無四壁。布裘白髮。危坐獨息。有子謙慎。循吏通儒。公活萬生。流慶必都。武惠山側。嶽嶽華表。過者式焉。視此有道。戴尙書神道碑

道光十年六月二十八日。署工部左侍郎前四川總督戴公薨於京邸。旨加尙書銜。照尙書禮賜卹。越七月二十三日。禮部尙書湯公金釗。奉旨賜奠於私第。戶部工部各遵頒發祭葬銀如例。其年秋。公之喪至鎮江。其嗣君郎中於義。寓書於恩澤。屬撰神道碑。恩澤於公有世誼。且辱公知好甚久。不敢以不文辭。按

狀。公姓戴氏諱三錫字晉藩號羨門江蘇丹徒人。曾祖京鸞祖士鵬湖北嘉魚縣典史父紀入籍順天補府庠生。考取三禮館校錄江蘇青浦金匱主簿三世皆以公貴累贈榮祿大夫例晉光祿大夫母張氏凌氏累贈一品夫人公讀書期大用不爲無益之學尤樂觀古名賢大君子出處施設中乾隆丙午科舉人癸丑科進士以知縣用署山西潞城縣補臨邑縣縣彫勅公撫字有方以治行聞時公父光祿公母凌夫人春秋高不能就官舍養公思慕不置一旦引疾歸而光祿公凌夫人俱馨膳不半載相繼歿人謂孝感若有先告云嘉慶五年服闋引見奉旨發往四川時蜀方治軍公至卽攝營山縣縣當四達之衝供帳絡繹公籌備無誤補南充縣攝綿州知州擢襄邊廳撫夷通判公在綿有惠政去之日父老遮道哭請建生祠公力卻之乃已歷攝資眉邛各直隸州知州成都府通判保寧順慶夔州成都各府知府嘉慶二十一年公再攝邛州時有姦民黃子賢等嘯聚亡命千人約以州試文童日乘間發公偵知聚謀之所屆期仍肩試如恆密遣民壯數百突往捕悉禽之案具大吏欲以軍功奏公請戮首惡一餘以軍流處之得旨獎飾時公已擢茂州知州二十三年擢寧遠府知府道光元年擢建昌兵備道時雲南永北廳夷匪啓釁與寧遠界一金沙江川民騷動公募鄉勇集數百人昕夕練習防衛永北難民沿江就食甯遠甯遠兵弁欲禁不使渡江公謂避難皆赤子悉嫗撫之全活不下數萬人兵旣息難民感公德不願旋因著籍於川時制府蔣公素以人才爲己任見公略能禦彊仁足撫衆牘薦甚力自是公膺特達之知不三載卽以布政使署總督蓋聖主知人之明大吏舉賢之誠我公忠實之政遂昭著於天下而天下百職事咸奮勉守道

益篤朝廷遂收得人之效。實自公始。其年擢四川按察使。二年擢江寧布政使。引避原籍。調四川布政使。三年奉旨以二品頂帶署四川總督。後復署成都將軍。五年奉旨實授四川總督。公久宦蜀。知蜀民立。懂好勇。教不先也。於是正書院。規制增義學三千餘區。拓考舍一千餘區。使士表其民。民化于士。又以治兵。定亂。須摧其機。讞獄科罪。須平其衡。蜀舊多事。非時過乃發。致患禍成。卽好殺喜功。不幸而激大變。七年。新都姦民楊守一等倡邪教。造妖書。公弋獲之。立正典刑。越甯生番。恃險遠。時出沒劫商旅。掠婦女。僉議欲加兵。公但飭吏捕狙黠者數十人治之。雲陽鹽販拒捕。守令以夥梟論。公謂售由官肆。則非私販。止十人。則非夥。當以重辟過矣。惟當治拒捕罪耳。官吏稱允。其他濬渠堰水利。禁販鬻子女。斷鐙嬉侈。靡掩埋軍與死綏之骨。表彰國殤。不屈之魄。凡有關於世道人心者。靡不修舉。傳云。公家之事。知無不爲。惟公有焉。七年七月。公七十壽。前期卽蒙恩賚。并賜御書數猷篤慶額。時公哲嗣於義任吏部員外。恭齋赴蜀。時人榮之。九年。內召。署工部侍郎。奉命恭詣東陵西陵。查估歲修事。十年。奉旨以原品休致。公具疏謝恩。蒙召對。上諭以居官甚好。全始全終。公免冠謝。公以久宦。思省邱墓。入秋擬遄歸。卽以是年六月。得氣壅疾。薨於京邸。春秋七十有三。公長身。火色。目爍爍有紫光。性清峻。不受饋獻。事上唯謹。不阿從。處同列以和。不以己長掩人短。精力逾厚。每當繁劇。益見縝密。極嗜翰墨。工行楷。尤工漢隸。手錄書及讎校書盈篋。喜讀薛文清。呂新吾。兩先生書記。道光元年。恩澤典四川試。見蜀士民述公爲州縣時。視民若子。姓其班。春也。過一村墟。則父老咸邀停車。奉茶果爲壽。嫗攜幼稚。纍纍環車前。公類能指其姓氏。與父老話農事。課

雨晴偶及家人瑣屑。皆歎然應。雜然諾。間有以事角口者。求辨于公。公爲譬況。卽散去。歲斷獄甚簡。於戲。庶幾古循良之風。復見於今矣。公配張氏。累封一品夫人。子一。於義甲戌科進士。官吏部郎中。女一。適山西試用知縣呂兆熊。孫一。朗。女孫一。以□年□月葬于□山之□原。銘曰。

大善之積。自微成著。下位廿年。曾不數載。天子有命。統東西川。天子壽公。公七十齡。不懈益虔。文師文黨。武師武鄉。謀略炳然。人震貴速。民知主聖。公宜累遷。所居父在。所去母失。咸戴二天。封圻遠民。惠罕下逮。獨公如前。鄙赫赫名。曲突火始。拔毛斧先。歷少壯老。束身清勤。植志貞堅。恩禮始終。進退綽綽。曷歸乎田。不及省墓。公心不怡。奪公何遄。墮淚之碑。遺愛之碣。過者式焉。

贈長蘆鹽運使伍公神道碑銘

公諱光瑜。字孚尹。號屏秋。姓伍氏。始遷祖德全。精麻學。明洪武朝。授刻漏科博士。掌欽天監事。賜第宅。居金陵。歷五世。皆世其官。六世少西。以助振賜四品冠帶。旌曰高義。曾祖致遠。以嗜古善鑒藏稱。祖宗鯉。以孝稱。父守旃。太學生。以廉讓稱。兩世俱累贈中議大夫。妣楊氏。陳氏。俱累贈淑人。公生三歲而孤。少卽穎悟。母督讀書。寒暑無間。稍長。治羣經。尤邃于易。善讀史。嘗錄成事。核所行得失。性好善。見善必爲。爲必有成。乾隆間。上元江寧兩學宮將圯。公與同學倡一錢約。積數年。整其圯如新。嘉慶廿一年。羣議重建江寧府學明倫堂。賴公成之。廿四年。大成殿災。節相孫公玉庭議修復。公又成之。是年九月之晦。大成殿先考漏初下。殿上騰白光如晝。又十一月晦。日將夕。有黃雲羃樞星門。蓋公自束髮時。每月朔望。必齋沐拜大

成殿階下。及是又督工。竭心力。人皆謂誠敬有符驗。由積累所致。云公倡恤鰥局。曰同善堂。行之有成效。而慮宦士族之鰥。不能與歲暮。必措貲計戶厚飲之。公倡揀生局。曰生生堂。法於大江磯泐。設拯溺船。一歲內風濤險巖。全活無算。又塗有殍者。恆以廩民畏牽。匿不報。致暴朽。公偕衆白之大吏。定規制。凡途殍。卽報局驗。嘉慶十九年。江寧大旱。百文敏公募助振。公時方抱疴。力疾偕紳耆勸輸。凡五振。九閱月。乃畢。大吏入奏。奉旨議敘主簿銜。公以餘羨白大吏。發質庫。權子母。作備歉用。迨道光三年。大水發。節孫公復勸輸。不給用。而公所請權子母。已積緡二萬餘。取以益之。乃足。上元。江寧。軍船之制。有運籍。有快籍。快丁例助運丁費。苦累殆不支。快費不解。則官呈議。催比急。則丁死。官與丁已交困。又快丁啖黠胥。口攀齊民。誣在快籍。比辨明。家已破。則困及齊民。先是漕督許公兆椿守江寧時。置官洲以劑快丁困。而每年運糧造舟之助。尙不給。公請借庫貯若干。勸快丁募捐若干。皆權子母。而運造一旦俱給。是舉也。快丁有恆產。則丁便民免誣攀。則民便。官無催比過當。則官便。無繳繚糾纏。則運亦便。於是江寧所轄各縣。有快丁籍者。俱仿公所爲行之。循江至安徽。聞風相效。蓋公倡率之功。幾徧東南維矣。澤至江寧。公適病。尋卒。凡哭公者。皆失聲。因究公樂善之專。魄力之厚。則咸謂公至孝友。務賙卹。自門內逮姻友。俱徧。乃知推暨覆被之廣。且大。由孝友然也。人不先本原。而務施博。又烏能施博哉。公好詩。著有補園集。以道光十年四月卒于里第。春秋七十有三。歲貢生。候選訓導。議敘主簿銜。以子貴。累封中議大夫。夫人馬氏。累封淑人性好善。與公同志。凡義舉。助公尤力。子若孫。曾林立。且教且撫。寢門以內。雖離如也。上下忻忻如也。先公

三年終于長蘆官廨。春秋七十子六。長齡。歲貢生。舉孝廉方正。以知縣用。長華。進士。廷試第三名。授編修。累官長蘆鹽運使。長英。舉人。湖南常德府同知。長松。長馨。俱庠生。長貞。殤。女三。長殤。次適孫玉銘。次適馬功浩。孫十。女孫十九。曾孫女二。以某年某月之吉。葬公某山某原。銘曰。

葉陽助王息厥民。億萬人值銜溢恩。手拯活之口弗論。護聖杖履鍾離意。蒼絲竹壁謹戲。概凡公所守敬無肆。積善袞袞福其嗣。

戶部福建司郎中鶴皋祁公神道碑銘

公諱韻士。字諧庭。一字鶴皋。姓祁氏。山西壽陽人。祁爲晉巨戴。其占籍壽陽。自河東公始。至公十有五世。曾祖敬德。祖雲瑞。贈朝議大夫。賜贈榮祿大夫。父文汪。贈朝議大夫。晉贈榮祿大夫。妣賈氏。贈太恭人。晉贈一品太夫人。公穎特。善屬文。自幼喜治史。於疆域山川形勝。古人爵里姓氏。靡不記覽。年十有九。館於靜樂李氏。李氏多藏書。書樓十餘楹。且弄善本。公寢饋凡五稔。益博洽。乾隆四十二年。拔貢生。是秋。鄉試中式。明年。會試中式。官翰林。五十年。大考翰詹。名列二等。五十四年。京察一等。記名以道府用。五十五年。擢右中允。五十六年。大考翰詹。改戶部雲南司主事。嘉慶四年。授河南司員外郎。五年。升郎中。秋八月。充順天鄉試同考官。六年。充寶泉局監督。在局兩載。九年。局庫虧銅案發。歷任監督皆逮問下獄。故事。交卸憑冊籍不盤。盤有期。公不及盤期。故無自檢覆。十年。同逮之。監督五靈泰遣子申訴。得未減。發熱河。公與宗室鳳麟等戍伊犁。始公在史館也。奉旨創立蒙古王公表傳。嵇文恭爲總裁。知公深屬。公任其事。公核

立傳體例計內札薩克凡四十九旗外札薩克若喀爾喀土謝圖汗車臣汗札薩克圖汗賽因諾顏若青海若阿拉善若土爾扈特杜爾伯特多至二百餘旗及西藏及回部均應立總傳分傳而苦無徵館送旗冊亦雜亂紛糾卽人名重累驟不可逗乃悉發大庫清字紅本分檢之有涉外藩事跡者擇要詳譯作底冊每于塵盆中有所得共詫爲異聞於是按部落條析之人立一傳必以見諸實錄紅本者爲確復據皇輿圖西北垂亘域爲綱領據理藩院世譜訂王公等派系凡八閱寒暑而成計書百十二卷終始佐公者則郭檢討在達也及公成伊犁也則創纂伊犁總統事略別摘山川亘里爲西域釋地蓋公學自乙部入窮源溯流蒼萃貫弗能擘其鉅實經世可施用性介直自將不逐時爲俯仰遂見抑於權要力殫苦不食報而師友皆名儒偉公以文字受知則朱文正王文端阿文成紀文達曹侍御錫寶金殿撰榜汲引若不及戴文端那文毅松文清則服公才識斷大事必咨之及其趨萬里歸來以著書佐治授經老爲客而歿嗚呼可悼惜也已公繼室劉夫人智識英毅公遣戍後家破夫人攜子輩還壽陽亟延師爲授學以鍼黹所入具師饌必潔酒肉而自攻苦食淡比公歸公之嗣君今閣學薦藻學有成入翰林人謂慈教半嚴教焉及閣學視學楚南背公久矣太君訓之若童時小拂意輒令長跪受杖環楚南人皆頌學使之廉敏有所自署內外斬斬無不憚太君者恩澤與閣學契交且同直十餘年一日閣學謂恩澤曰憶先公在狴犴奏當重辟薦藻甫十一齡與世弁實侍側聞翼日獻上當勾薦藻股弁泣涕不自勝先公意殊泰然就燭下爲削詩文章數首引枕斲胸睡迄今思之森森若身置刀戟林也嘉慶二十年三月二十五日歿於保

定書院。年六十有五。官郎中。誥授奉政大夫。以子貴。晉贈榮祿大夫。內閣學士。兼禮部侍郎。加二級。配弓
恭人。先公卒。年三十。劉夫人後公卒。年七十有一。皆贈一品太夫人。子六。歲藻。增貢生。四川鹽場大使。宜
藻。殤。采藻。國學生。候選府檢校。富藻。殤。蕪藻。內閣學士。兼禮部侍郎。南書房行走。宿藻。舉人。女三。長適候
選訓導。王敷政。次適兵馬司吏目。閻庭椿。次適候選訓導。張麗暹。孫七。世弁。優貢生。候選訓導。世庚。庠生。
世齡。舉人。世舒。國學生。世佶。世敦。世長。女孫二。公著有藩部要略若干卷。西陲要略若干卷。西陲總統事
略十二卷。西域釋地二卷。萬里行程記。己庚編。書史輯要。珥筆集。袖爽軒文集。覆瓿詩集。濛池行藁。西陲
百詠。訪山隨筆。若干卷。嘉慶二十三年。公暨弓太夫人葬於葦上之原。道光十有四年八月某日。劉太夫
人合塋封。閣學屬恩澤爲神道碑。銘於墓道東南。銘曰。

公性介而和。伉爽而英多。學璞沈而輝華。喜會友以文清。酷雅歌。括史例。通國書。指掌輿圖。蔚然著作家。
才富遇嗇。命也柰何。不於其身。於子若孫。視此豐碑之峩峩。

光祿寺卿興縣康公神道碑銘

道光十有四年四月二十五日。前湖南巡撫康公薨。越明年。其孤兆奎。以武進李兆洛所爲行狀。乞余銘
神道之碑。余故知公者。故劄其大要以顯焯之。按狀。公諱紹鏞。字鏞南。別字蘭皋。其先自陝遷山西清源。
數傳至登有。又自清源徙興縣。今爲興縣人。曾祖萬方。祖惇。俱縣學生。贈資政大夫。江南河道總督。晉贈
振威將軍。生基田。官南河總督。次基淵。卽公考也。與兄皆以進士縣令起家。歷官江西廣信府。贈中憲。

大夫晉贈振威將軍兼提督曾祖妣郭氏祖妣王氏妣孫氏王氏生妣顧氏皆贈封一品夫人公兄弟七人於次居五生而資性過人年十二廣信公歿於任執喪如成人乾隆壬子科舉山西鄉試嘉慶己未科成進士引見用兵部主事補軍機章京充會典館總纂修官歷兵部郎中鴻臚寺少卿通政司參議大理寺少卿鴻臚寺正卿公之官大理也當嘉慶十八年林清首亂畿南山東河南教匪響應公方隨扈塞外作小冊備書三省阨塞險要及將弁能否兵數之多寡適會上問當軸卽以其冊進仁廟由是知公才可用大用擢安徽布政使陞辭上命之曰爾有老母皖江一水可通毋慮迎養時安徽四十餘縣皆旱災公諭勸富室捐資各振其鄉凡輸銀九十萬兩米麥七十餘萬石益以帑項數十萬兩荒賴以濟然皖省數災而藩庫止存三十餘萬兩其借支款項有出無入公嚴杜借支當奏銷時卽於州縣應領項畫抵正供省一領一解之費庫貯增多二年之內實積帑三百二十九萬八千餘兩某年擢安徽巡撫公自少負文武材機神開張不主故常鱗雜粟錯消以囊篋喜蹠弛異量之士務立名義功業有可成就及任封疆益以艱鉅事爲己任不恤常談浮議安徽巡撫銜故兼提督而廬鳳潁民俗悍輕備宗暉氏之族村里相望又洪澤湖大江及阜陽亳州水陸奔轆爲私梟捻匪所出沒公相其扼要繕營房立巡船先後擒治李才楊七等五十餘人奏置之法盜乃戢又擇標下伉健者每日五十人入內射堂角藝募精技擊者教習而時賞罰之公自幼喜習騎射所至完器械簡卒伍後在湖南造擡槍數十桿以教撫標二營至獠人稱亂猶賴其用二十四年調任廣東時總督祝嘏入京兼署其任明年三月入覲奉命於回任時赴豫察視馬營

壩及儀封漫口。今上元年。有旨查辦陋規。公奏數千言。大意以陋規入奏。似非政體。若奏減其數。則不減者。官吏皆明目張膽。視如廉俸。而已減者。且額必私增。若盡裁之。官不能堪。反益病民。議遂寢。在粵二年。先後緝獲劇盜會匪數十案。行旅以安。是年六月入京。署禮部左侍郎。奉命偕相國松筠赴浙查辦事件。丁顧太夫人憂。服闋。以禮部侍郎出爲廣西巡撫。旋調湖南巡撫。苗疆自故按察使傅公鼎經理之。畏帖者二十餘年。公視事後。卽修葺傅公所築碉卡二千餘處。禁民人毋得入苗疆射利。以兆釁端。洞庭湖多盜。環湖縣以水上道里。遠近不明。相諉避盜。不時得公定其界址。爲圖常置左右。嚴徵巡令。無文武無敢不用命。編查漁舟。如保甲法。盜無所容。而公猶以苗疆自初平時。官其桀驁者羈縻之。今日久倚官作威。致凌犯自相殺。不治則損威。治之則法重。如戕官例難盡行。多設苗官。未爲有益。反益生事。惟詳考其所轄道里近遠。可歸併者。缺出不補。以次漸裁。庶無後患。欲陳奏之。未發也。而適值六年水災。其醴陵、茶陵、數縣城郭皆敗。壞民田廬。無貧富皆盡。捐輸不可行。而費用廣。視安徽旱災事尤劇。分率司道分行撫卹。拯民於高阜而棲之。行糜粥及藥物棺槨。乞恩展振。及修屋宇費。皆得俞旨。公伯父河督公善言水利。公幼習之。撫安徽時。修堤堰於濰河北股河。以遏黃水。由減水滾水諸壩。軼入靈璧。宿州者。又築捍江堤千二百丈。於無爲州之黃絲灘。及湖南水災後。復澧州田侵入夕陽湖萬四千五百畝。排水去污。皆可耕。其不可耕者。萬一千八百畝。豁免起科。分別奏行。至道光九年。入覲。陳苗疆事宜。上命與督臣熟籌之。議未定。而公入爲光祿寺卿。旋致仕。道光十四年四月二十五日。卒於河內里第。年六十五。公直軍機十年。

受特達知。巡撫四省。賜天府圖書。稠疊優渥。所建立多灼灼。可指白。而公常慊然未盡。與僚友言。每深慕孫文定。陳文恭之爲人也。事太夫人。竭情承歡。不計費多寡。深友疏客。莫不意滿。配封一品夫人。趙氏。子二兆奎。正二品廕生。刑部直隸司郎中。記名以道府用。兆臺。國學生。孫錫齡。縣學生。與齡成齡。椿齡。億齡。俱幼。以道光某年月日。葬於某縣某鄉某原。銘曰。謹出納以裕封椿。不積而贏。是師研桑。日肄金版。補苴泰平。要隘允猶。可治川治兵。筭數大事。雄略偉斷。憑陵談笑。懦者悚難。事君事親。有古名臣。我稔知之於洞庭之濱。流丸歐夷。公稔知之。我銘幽宮。實無媿辭。

翰林院修撰汪先生墓志銘

高宗純皇帝御極之四十五年。歲在庚子。臨軒策士。時賜及第第一名二名三名。皆鴻才博學。負天下清望。而先生以會試第一。膺殿試第一。授職修撰。年甫二十六。長身玉色。眸子顧盼炯然。朝宁偉之。四十八年。充三通館纂修官。本衙門撰文。是年冬。奉旨入直上書房。五十一年。典山東試。是年冬。督雲南學政。使還。仍入直。五十六年。以本生母憂去官。五十七年冬。服闋。仍入直。五十九年。八月十五日。先生疾終。凡通籍十有五年。得年四十。先生姓汪氏。諱如洋。字潤民。號雲壑。浙江秀水縣人。先世居休寧。國初遷桐鄉。曾祖繼燦。吏科給事中。祖上堦。雲南大理府知府。父仲鈞。舉人。贈奉直大夫。母許氏。封太宜人。本生父孟銷。進士。吏部文選司主事。誥授奉直大夫。以先生兄如藻官。晉贈朝議大夫。本生母祝氏。贈宜人。晉恭人。金

氏封宜人。晉太恭人汪氏自先生以上五世。文望輝赫。祿位踵於朝。先生蚤慧。博覽典籍。雄於文。豪於詩。試輒冠軍。每一篇出口。相傳以熟。走數千里。垂數十年。諷詠者恆不絕。及其冠倫魁。侍禁近。文若詩益鴻。麗名益譟。天下士識其面者。以爲瑞。性沈厚。喜怒不形。外和易。內方介。守潔用敏。設措部分。才常什伯人。其視學滇也。滇士志學而苦無師。先生行教家塾。子弟法。每試一題。則操管成一藝。試畢。示諸生。卽召諸生環案前。爲評隲點竄。言語姁姁。使充然各有所得。於是滇之文日以上。旁及詩賦。皆雕繪可誦。值己酉。遴選科得人稱極盛。時功令當以五經並試。先生以士專經久。遽使兼習。或未能驟通。奏請每科以一經輪試。輪畢然後並試。得旨俞允。先是大理公惠愛在民。歿有廟祀。屢著靈異。先生按試大理。拜謁於廟。郡人以爲明德之後。必有達者。天道之可信如是。相與焚香擊踹以送。先生自使滇還朝。帝心益眷顧。優獎渥賜俱稠疊。而先生涵養淬厲。矧矧匪懈。知與不知。皆以公輔之望歸之。孰意年甫至彊仕。官未轉一階。抱其瑰璋。奄卽長夜。有識者皆歎生才之不易。而才不竟其用。爲尤可惜也。先生同及第第二名爲江丈德量。其三名卽先夫大。先生視滇學上書房缺出。先大夫實充焉。又先後同直廬。出肺附論契好。每當春秋佳日。噲和談讌。脩然意遠。其視權要熏灼之門。若水火之不可蹈。憶恩釋總角時。先生一日偕江丈集先大夫廬。恩澤出拜謁。因得識先生風範。迄今思之。座次言次。悉在眼。亡何江丈先歿。次年先生歿。次年先大夫歿。嗚呼。其舉也連茹。其歿也踵相接。知先世結締非偶然。而恩澤以十齡孤露之身。忽忽三十餘年。追銘大君子之墓。抑何幸也。又何哀也。夫人陸氏。封宜人。例晉太宜人。清德世宦。篤生賢淑。逮事二姑。

皆得歡心。先生早世，而家以不墜，教其子成名繼志，以揚以顯，皆太宜人。力後先生三十六年而卒，享年七十有七。子三世植，邑庠生，世楠，附貢生，雄縣知縣，世樽，進士，官編修，提督湖南學政。女三，長塔，江西贛南道，加按察司銜，潘恭常，次塔，直隸香河縣主簿，管嗣許，次塔，邑庠生，熊鍾祺，孫三，葆煜，葆烜，葆光，女孫六。先生著述甚夥，多散逸，惟葆冲書屋詩集若干卷，手自編也。詩奄有唐宋諸大家風，卓焉可傳。以道光九年十二月吉日，合葬於嘉興縣六萬金港之原。銘曰：豐其才，嗇其德，則不竟其庸也。先生則才櫟括於德，中純鉤之銛，而夫撓其鋒，宜壽且崇，而位未躋乎列卿，書未滿乎名山，尤可恫也。宜後之人接武而隆隆也。

候選同知李君墓誌銘代

君姓李氏，諱莫，字堯階，號竹君，故金陵世族也。曾祖國柱，祖春，父師韓，歷任石阡、南康知府，誥授中憲大夫，晉贈資政大夫，妣凌氏，封夫人，生母徐氏，封太恭人。君年十二，資政公及凌夫人先後棄養，君哀毀骨立如成人。事生母徐太恭人，孝養周至，尤慎疾，疾則晝夜旁皇無措，必安乃釋。昆季凡六，君居四，志趣不必盡同。君處之盡恭友，仲兄蘭疾篤，君念承先業，非仲不克支，乃焚香告天，願以身代。仲沒後，教猶子尤盡瘁。兩江秋試，人數至多，恆苦號舍隘，每錄遺，輒多所屏棄。君請於邑宰白大吏，願捐貲購隙地，增號舍，遂剋日鳩庀，得八百餘間，多士德之。嘉慶十九年，江寧游饑，君捐貲無慮巨萬，復于城西永慶寺設粥廠，目視手告，疲斃不少休，使老羸皆得所，全活無算。君家世席豐，約出之人以爲侈，謙出之人以爲倨。君

躬躬守盈泰之戒。故堅持淡泊之志。力行施予之惠。誦法談道。一滌金幹玉相之習。而靜慧相發。藻翰炳炳。亦非時輩所及。余知江寧府時。君應童子試。見其文異之事。竣來謁。則儀兒玉映。進止溫雅。知其澤於詩書者深。是年君遊邑庠。就余問字。余欣然以爲爲國家得一俊傑。尋余莅淮。徐君送餞江滸。猶殷殷訂後約。不數年而君之凶耗至矣。世有豐其德。嗇其遇者。則必不嗇其壽。今君數舉未得一第。而其年甫壯而折。若有可爲。盡齋以歸九原。嗚呼。是可哀也已。君生於嘉慶二年六月。卒於道光十一年二月。得年三十有五。上元縣學附生。候選州同知。賜五品銜。誥授奉政大夫。馳封中憲大夫。娶于氏。封恭人。子二。長作霖。次作柏。女一。以□年□月□葬於□城之□山原。銘曰。

崇其心田。真意盎然。以從王事。則專也。處富若飴。施人卽忘。以蓄己德。則昌也。舉舉其兒。熊熊其文。宜紅青雲。而齋志未一伸也。棗強之墓。輔嗣之墳。是生大雲。以覆露其後昆也。

王君元長墓志銘

君諱大善。字元長。姓王氏。世爲歙人。曾祖廷格。祖士璠。父文述。兩世皆贈奉政大夫。妣余氏。贈安人。君性強立。能任事。尤工心計。世父某。業淮北。鱈。算絀多負。命君振之。君力竭。度無可爲。棄而之毘陵。毘陵亦世鱈業也。君稱貸籌什一業。以大興。嘗語人曰。凡業鱈。當察天時。審人事。知物力。贏絀則天時得。知俯仰。高下則人事修。然非巧算不能解。故特精乎算。凡數過百億。則持籌者苦茫昧。君卽屈指高倡曰。若干算。持籌者必往復詳核曰。若干算。如君言。蓋君算沙等恆河。亦不持籌也。澤昔經毘陵。恆宿君肆。之別齋。君每

犯星起服浣濯衣。儼坐容止清肅。子若弟雁行侍。稍通悅卽斥。友朋造語皆唯謹。心甚異之。及處里門。聞族媿待君舉火者。手指數百。而君不特無德色。人偶詢及。輒引愧自咎。恆若不慊。嗟乎。明算科不講久矣。自司農司空之屬。不能舉其籌。而奸吏日以文巧變亂射利。君之算乃有天授。不得爲在官用。以市隱終。可嘆也已。君由太學生捐輸。議敘通判銜。加二級。封奉政大夫。以道光九年六月十五日卒。壽八十。配鄭氏。繼配項氏。陸氏。子一。太學生國屏。先卒。女九。孫一。曾佑。以□年□月葬於□山□原。銘曰。其營拮据。其施剪餘。九族待其餽。宜其考終于堂。而哭弔者塞路隅也。

通政司副使顧公墓志銘

公諱蕤。字希翰。一字吳羹。號南雅。其先世自江寧遷吳縣。有貞孝先生名國本者。載吳縣祀典。爲公五世祖。曾祖漸。考授州同知。祖階升。國學生。考應昌。國學生。俱贈中議大夫。妣汪氏。贈太淑人。公中嘉慶七年進士官編修。十三年充會試同考官。十七年御試翰詹。公名列一等。擢翰林院侍讀。是年放雲南學政。廿五年授日講官。秋九月擢侍講學士。十一月上疏。不稱旨。降編修。道光九年擢右中允。擢侍讀。十年擢侍講學士。十一年擢通政司副使。十二年五月卒。春秋六十有八。公爲詞臣儒官。凡三十餘年。文學動天下。而結主知。崇物望。實以奏疏顯。其督學滇也。道河南。以風聞墨吏奸民入告。嘉慶十八年。聞逆匪林清變。疏稱中禁嚴密。若輩敢闖入肆猖獗。則圓明園距都城遠。尤宜備。其擢學士也。適值仁宗升遐後。疏稱方今時勢所急。惟崇君德。正人心。飭官方。三者爲尤要。今上召見。凡稱所言都是者三。其復遷學士也。疏稱

西域逆回滋擾。不難鋤。懸於目前。而難弭禍於日後。欲請於喀什噶爾。添重兵。控制安集延。俾回人不敢窺伺。且其地密邇英吉沙爾。葉爾羌。又東南爲和闐。皆有水草可耕牧。宜募民屯田。以備戰守。更請慎簡大僚。無分滿漢。務得讀書識大體者任之。以廉靜寡欲。通達事理者佐之。其遷通政司副使也。適湖南北江南。江西。浙江。皆大水。疏稱飢民與鹽梟糾合。易生事。鹽梟不盡去。終爲巨患。緩治之則養禍深。急治之則召禍速。故欲禁其妄行。必先謀其生路。復請變通鹽法。聽民挾貨趨產鹽地收買。隨時納課。收課之後。卽不必問其所往。俟鹽產盛。丁力紆。卽令課歸丁。不限疆域。二疏俱留中。公課士嚴而恩。簾閣據几。口講手畫。懇懇忘倦。必其人領悟乃已。滇士翹穎者多出其門。來京輦者。多就公問業。或就公廬止舍。凡四方士。經指授者。皆砥躬礪行。有文學能自立。而公文壇老尊宿之譽。日益四馳。知與不知。皆欲乞書畫以自飾。爲詩文。師大蘇。賦駢體。俱師唐宋。書由歐陽率更入。晚乃倣褚登善。間亦作墨蹟。嗚呼。卽所造就。已必傳無疑。而公所學深醇。實能通政教之源。以生平所讀書反諸身。驗諸事。爲當世拯溺揀焚之具。加以忠愛。倦摯。急公忘己。有所見聞。必獻之於當寧。或冀一行。卒也。屢荷褒擢。駸駸乎且大用。而公衰病不能待矣。史稱陸宣公言本仁義。炳炳如丹。如公其庶幾乎。配汪氏。贈淑人。以其妹爲繼室。封淑人。子剛曾。殤。以猶子條曾爲嗣。女二。長適吳慶華。次幼。以□年□月□日葬公於□縣□山之原。銘曰。

弋名者。鳴其利。私其實也。絢名者。鳴其名。沽其直也。倦懷于君國。近不喑。遠不喑。不叩而必鳴。其言夷且貞。請以觀先生。

兵部尙書王公墓志銘

道光八年平西域功成。皇帝臨午門受俘。兵部尙書以組縛逆酋。生獻闕下。萬衆爭覩驚歎。而青陽王公適掌兵部。禮成得越等褒賞。公供職益虔。久不懈。上亦倚畀。不輕改他職。任兵部尙書凡十六年。道光十七年正月。薨於位。天子震悼。詔以清勤端謹。克盡厥職。褒之。賜祭葬如禮。子元榜。乃以公狀屬恩澤。爲之銘。用不敢辭。公諱宗誠。字中孚。又字蓮府。青陽王文僖公子也。母阮太夫人。以乾隆戊申年中順天鄉試舉人。庚戌成進士。賜及第。第三人。授編修。歷任禮部侍郎。署工部侍郎。工部尙書。終兵部尙書。誥授光祿大夫。經筵講官。賜紫禁城騎馬。當純皇帝睿皇帝時。嘗屢爲雲南四川陝甘省鄉試主考官。會試同考官。及文武會試總裁。於河南山東江西皆久任學政。及今上卽位時。閱殿試朝考散館卷。凡數科。門下士旣多貴顯矣。而公又少年早取科第。文僖公官禮部侍郎。公已爲侍講學士。同扈蹕東巡。睿皇帝幸翰林苑。父子同席。賜宴和詩。純皇帝實錄成。公以詹事爲纂修。賜宴禮部。而文僖公官尙書爲主席。後文僖公以年引退。公又相繼入直上書房。奎章珍器。賞賜重疊。其一家父子。極文臣眷顧之厚。蓋同時所無。雖睿皇帝亦嘉歎其兩世知遇。忠謹自將。時發天音。而垂清問也。而公謙牧自處。接同官及舊嫻。疏友寒賤。後輩皆自居敵以下。不敢與鈞禮。後進見公。或避去。不敢當。公之謙挹。自少至老。未嘗一出言。一舉足。失先於人。任學政。優禮愛士。然遇奸弊事。必發抉。不稍受顏面。留根蔓。居京師。其宅當冠蓋衝衢。車轍皆過。不留。無謁以私者。其嚴介不苟如是。而人皆習其和而忘其峻。昔班固以道德之士。皆出於史官。知秉要執本。

清虛以自守。卑弱以自持。合於易之嘽嘽。一嘽而四益者。此特公之跡耳。恩澤自通籍時。卽受知文僖公。與公至款曲。每以禮謁文僖公。公必衣冠侍。文僖公卽正容悟物之萬石君也。而公則舉策數馬之太僕矣。自其學以孝謹著。世躋高顯。凡鄉里稱篤行者。鮮不以名父子爲首稱焉。其他嘉言善行。施乎家。及乎朋友故舊。尤人所易知者。不具載也。公生於乾隆二十九年四月二十六日。薨於道光十七年正月十二日。年七十有四。配江夫人。繼配翁夫人。大興翁學士方綱女。皆先公卒。子元林。廕戶部主事。及三子元栻。太學生。四子元琛。皆早卒。今官刑部員外郎者。爲次子元榜。女三。適上海趙榮。貴州邱煌。上元董斯廣。以某年月日葬公於某鄉某原。銘曰。

九乳垂天。作鎮青陽。歸神於公。父子正卿。公逢福世。粥粥日晦。植棟如林。不私一士。高門峻城。奸莫敢攀。惟其和光。不怨而慚。用承天寵。保世禔躬。哀榮之典。以奠幽宮。

吳篁洲遷葬志

君諱鎔。字篁洲。安徽歙縣人。曾祖尙選。祖文玉。父煒。光祿寺少卿。乾隆朝。官御史。直聲震朝野。君以名父子。工詞賦。應戊申科。召試。賜舉人。屢試不得官。以平山縣教諭終。寄籍京師。歿葬永定門外翟家莊。子贊。瀛。操履極謹飭。溺苦于學。飢寒齋志以歿。無嗣。君門弟子鄭上舍復光。痛君祀之將斬也。謀于同里諸君。贖錢若干。以道光十四年十月十二日。遷君柩。及配蔣。妾某。柩凡三。于石榴莊歙義園。俾祭掃無闕。時上舍適有西河之慟。抑哀制淚。奔走數日。乃定計。嗚呼。俗益衰薄。有子孫懋置其祖若父。放不祀而餒其鬼。

者。上舍乃門弟子。獨倦倦于塾師而爲之謀永久之祀。而同里諸君。推友誼以及其所尊事。皆激于義。可爲世風勸。且也。乾隆間。倡建今歙館者。卽光祿公也。其子孫之流寓者。乃托于義園以食。抑何不幸哉。雖然。使上舍無此舉。則光祿不享爲善之報矣。今門弟子一倡。而會葬者響應。皆詩書之緒所衍。抑何幸哉。

汪君別傳

汪君炯。字士光。號春齋。歙人。系出唐越國公華後。曾祖景晃。有醇德。婺源江經師。永爲立生傳。稱其孝友。陸媻任恤。祖泰安。養志潔身。秀水鄭贊善虎文。稱爲隱德君子。父孝濬。爲父吮疽。以孝聞。君承三世舊德。益自淬厲。爲端人事。繼母以孝。調媻黨以惠。澤躬以詩書。凡相知契。有喪葬嫁娶不備禮者。皆飲成之。乾隆丁未。甲寅。壬戌年。鄉里饑。發粟減直。全活無筭。家廟祖塋。但有修葺。皆傾橐。計不下萬金。行賈之暇。輒手一編。尤喜與文士接。立文社約。並捐貲爲應舉者助。嘗賙人。不自言。不俟人請。不責人報。然受金者輒稱道不置。居恆告其子曰。吾曾祖明若公。得江先生之傳而傳。吾感慕江先生。故自號曰脊齋。子孫其勿諼也。卒年六十有五。子三。時育。有時譽。

論曰。假人不德。不責食人。不使不役。親戚愛之。衆人善之。所謂隱德君子也。昔文范先生以三世名德著。況四世乎。吾鄉多隱德。其子孫或達或否。然達者或遽謝。而不達者終亦必達。且曼羨也。吾於汪氏卜之。湖南提督軍門楊君繼室龍夫人墓誌銘

夫人姓龍氏。四川成都府華陽縣人。曾祖某。祖某。父延泰。乾隆辛酉科舉人。官至廣東佛山同知。夫人年

廿二歸軍門。時軍門已貴顯，爲總兵。夫人幼讀書，洞曉大義，才果識偉，柔而能強，溫淑而敏斷。與軍門愛敬無比。嘉慶十一年春，軍門以寧陝鎮總兵，攝固原提督。夫人留寧陝署秋鎮，所轄兵叛，戕攝總兵某，及中軍遊擊等，先是額兵六千名，例月給米折銀三錢，遭匪賊蹂躪，物值益昂，所領不給食。軍門白經略某，具疏申請，部議權加二錢。俟三載後再定議。及是執事者，停支持報，兵忍饑兩月，有叛意。攝總兵某不善撫，以威裁之，故有是變。時七月辛亥也。有聞叛而請夫人行者，夫人曰：「不可。若我出而兵叛，是知賊情也。人其謂我何？」至夕，叛者蠶起，焚廨舍，劫軍民在宮眷屬，暨民婦女，皆驚竄。依夫人爲逃死藪。時未叛者譁於內曰：「夫人勿死，我輩受主帥恩，賊入當以死拒，脫不敵，主帥歸見我輩屍，見我輩心已叛者，譁於外曰：「夫人勿驚，我輩受主帥恩，今迫而叛，不與夫人。夫人勿驚，卽仇怨有避夫人側者，亦不報也。」夫人端坐後堂，戒奴婢曰：「死生有命，敢號泣者懲之。」嚮明，叛衆叩閣請謁，避難者皆繞夫人哭，乞勿納。夫人曰：「愚哉！若輩欲入卽入，孰能禦之？請見則見，何懼爲？」命啓門，叛首數十人，手血淋漓，環伏堂下，痛哭曰：「我輩罪大惡極，將欲竄身山谷，緩須臾死，恐去後有驚及夫人者，求夫人行。」夫人大聲謂曰：「若輩雖戕官爲首者，洵不可追於多人何尤？主帥旦夕歸，且爲若輩白其事於朝，非盡殲也可。各罷歸伍，不然，斬我首去。」衆曰：「我輩血誓同死生，能聚不能散，乃昇輿以俟。」夫人將升輿，避難者千數百人，齊慟曰：「我輩死矣。」夫人復諭叛衆，此總總者須隨我出，毋傷殘，衆皆唯唯。於是出婢子衣履，與在官眷屬，結束先行，乃肩輿殿其後，出署。衆復請曰：「昨宵廳城亦同時破，衆掠未歸，歸卽傳來立隊。」夫人曰：「止，何等狂悖，而猶循此規制耶？在此者亦

毋張皇。恐多人驚。衆復唯唯。送至澗溝。痛哭而返。癸丑。夫人抵興安。越十有四日。公子承注生。會軍門自固原策單騎。馳千二百里。入叛軍。收降撫逸。籠束歸伍。乃誅其尤凶橫者。而衆情汹汹。有悔降意。於是叛首蒲大方等。請於軍門。往迎夫人。以測軍門心。軍門不介一奴。許其咸往。夫人冒雪抱公子。泰然登程。蒲大方。王奉。口角毆夫人止之。至漢陰廳。夫人踞坐。使左右鞭蒲大方四十。械而行者三日。始釋之。見軍門。絕不言。尋羣帥官屬來賀。夫人以其事詢軍門。且偵叛衆意。軍門乃問夫人所以不告之故。夫人曰。知而不言。是廢法也。告而加誅。法無重科。爲妾謝衆官。妾不見徹。不敢發。發而衆情貼伏。何問爲。衆官皆嘆服而退。軍門以卒叛。故戍伊犁。尋赦歸。攜夫人還里。侍某太夫人養。蓋自夫人歸後。頻年多故。甫得謁太夫人。太夫人風緩不能言。手索頤指。惟夫人會其意。日夕在側。太夫人喜見於色。幾忘所苦。亡何。軍門復起鎮廣東。奉太夫人行。夫人從軍門移鎮陝西。甫之官而太夫人卒。夫人素善病。至是益困。然偕軍門返里。門力疾營葬。備盡哀禮。居恆謂軍門曰。方寸靜潔。則理勝欲。念慮牽繫。則欲勝理。人生最忌情流。爲欲當軍門撫叛卒時。自謂功足以贖過。而夫人謂曰。君必赴伊犁。當別經年。顧屢立奇績。不久卽還耳。卒如夫人言。嗚呼。若夫人者。可謂明智矣。夫人教子極嚴。善鼓雅琴。工畫蘭。時時爲之不倦。以道光五年十一月廿五日。薨於湖南提督署之內寢。年四十有三。封一品夫人。子一承注。恩廕一品監生。娶福建按察使蘇公兆登女。女一字原任陝西華州知州劉君某之子宗浩。孫一恩棣。以是年某月某日葬於某縣之某原。空其左方。爲它日合窆計。則公子承注當夫人綿悞時。度其意而請之。禮也。銘曰。

猗歟夫人。識力堅定。相厥夫子。勸勉以正。作嬪之初。旣榮旣都。鳳車翟衣。龍節虎符。夫子好文。對講師律。心兵不擾。乃築鐵室。主帥遠適。叛車一噪。男走女呼。環城動搖。主帥有恩。夫人贊之。欲語叛軍。麾以散之。叛徒求謁。夫人踞見。責以大義。示以不變。攘攘沙蟲。爭舁魚軒。夫人叱之。噤不敢言。提嬰挈姆。依夫人所。翼之。遂脫禍罟。其時夫人孕玉將產。無驚無恐。竟得雛贊。主帥亟歸。招降叛軍。叛軍疑之。請迎夫人。叛酋忽門。若鬥兩虎。夫人鞭之。若縛兩鼠。帥謫帥還。乃移歲陰。有姑白頭。風緩不掛。攜手歸覲。載色載笑。姑意甫動。夫人以告。夫人有子。賢而多能。教督不休。大愛似憎。娛此泰平。夫黻妻佩。無忤君父。能治內外。生犀繞帳。鼓琴終夕。曲罷寫蘭。華葉盡碧。嬾曜忽隕。將星蒼涼。幸卽珂里。一舟可航。靈風灑灑。瘞此明月。女丈夫禍。過者無忽。

先母項太恭人事略

母諱□□。字玉書。歙縣人。父雲騎公際會。母程宜人。項固歙巨戴。雲騎公任俠負逸氣。能書畫。騎射。與我先大父朝議公爲中表。館先大父於家。課子若弟。時先大夫學士公。童年絕穎異。誦十三經若流。雲騎公奇之。母讀書內塾。亦絕穎異。以歲時伏臘。謁先大父。道勝常。進退合度。若成人。先大父亦奇之。婚議遂定。先大父治家謹肅。先大母吳太恭人。率子婦承事若嚴君。寢門內不聞聲。歎聲。兒啼聲。我母年十八來歸。性至敬慎。操作尤勤力。先大夫文名日益。謬試屢不第。先大父望愈切。先大夫固泊於名。而懼無以成親志也。每報罷。輒歎。不自勝。母始勸慰。繼則相與飲泣。遂成心疾。幾殆。先大夫官翰林。僊值內廷。母佐內

政。凡十數年。攻苦食淡。無異未仕時。逮先大夫奉命視學山左也。母喜曰。夫子以二老人睽離。故恆欲解組歸。今遂迎養志矣。執意抵山左任。甫七日。而先大夫遽見背。母痛絕。時叔父儒林公在任所。經紀含斂。百方喻譬。母懼以一死益戚堂上心也。度堂上聞此。耗必不支。必覲堂上。乃徇庶無憾。遂扶柩挈孤。間關旋里門。先大母一見恩澤。涕下不可止。先大父復喻譬。母數四。母乃事先大父母愈敬慎。操作愈勤。力先大母憐之。因勞曰。爾處官舍十餘年。尙能親饋饗。可謂賢矣。然我念爾若是。輒痛兒甚。兒幸有子。子賢不肖不可知。但使我見兒勝其父之衣。則我心釋然矣。恩澤晝持束書。侍先大父側。夜則侍母側。母篝鐙督恩澤讀。恩澤弱且鈍。吻燥口苦。猶未成誦。母且泣。且口授。向明必背誦無譌。乃使詣先大父所。恩澤年十五。入泮。先大父尙在。年二十。舉於鄉。年二十七。成進士官編修。先大母尙在。至是先大母謂母曰。汝撫孤事已就。兒出身事方起。教不可一日弛也。先大母見背後。三年。恩澤奉母官京師。及奉使於外。皆迎養。母教責尤嚴。常曰。爾屢奉外使。我豈不悅。然奉使以廉爲體。以明爲用。汝何能明。惟廉則生明。若不廉則負聖恩。悖先人德。雖奉養極華盛。我不欲也。恩澤奉外使。凡六年。母食不重味。躬服澣濯。且晝夜兢惕。惟恐恩澤或望於過差。嗚呼痛哉。母中歲頻厄。所冀幸者。一弱子耳。未成立則憂。未學則憂。未仕則憂。及能粗給供養。而來日又苦短也。況外迫公事。則定省缺。久膺幽憂。則疾疾頻。求從容笑語于燕閒時。蓋亦不數數覲也。嗚呼痛哉。母事先大父母極孝。記先大父病嗽。上氣疾。母治饌。必使與方藥無悖。及病革。晝夜不敢休。殯後。哀毀盡禮。先大母病風緩。神志恍惚。臥榻。凡二稔。母時年過六十。晝夜侍旁。潔飲饌。浣廁。踰

衣不解帶者亦二稔。及殤。撫棺一慟。齒無故自墮者二。承兄叔姊姒以和。御下公以寬。生平無疾言遽色。聞人有阨若身受。戚族稱貸。雖典質勿吝。是非善惡。了然而不欲明辨。讀書通大義。幼所習者。至老背誦若流。尤好岐黃書。辨寒熱虛實。雖專家不能奪也。常誨恩澤曰。爾務泛覽而寡要。若力行仁恕。則所業進矣。又舉漢劉寬傳相示。蓋以恩澤持公事過弁急也。嗚乎痛哉。以恩澤蠢愚而內不拂于家。外不戾于官。徒以有母在也。今且失母。知不免于小人之歸矣。恩澤生四十又五年。自母視之。猶孩提也。寒暑飢渴。日必三四詔焉。今噢咻之聲。猶尙在耳。而望其曠。已臯如也。嗚乎痛哉。慈孝如我母。明智如我母。而不得食子之報。侍養無狀。其又奚道。嗚乎痛哉。母以道光九年二月十六日卒。得年七十有五。子一。恩澤。孫一。德威。以先大夫官學士。封恭人。以恩澤官祭酒。晉太恭人。

程侍郎遺集初編卷九

祭錢東生夫子文

於戲。亶亶夫子。敏穎超特。文而又儒。學統萬緒。以蓄千智。未竟一粵。既泊仕宦。復廉取名。用晦而愚。由壯逮老。彌衰彌健。半菀半枯。豫尅亡日。經畫含斂。招詢友徒。豈有所赴。都錄雲台。委羽遮須。音徽未沫。春蘭秋菊。請陳其麤。夫子才捷。文不加點。成誦借書。分占口授。十手擊脫。乞姑徐徐。千詩百賦。子唾而就。衆喘而吁。博關典籍。尤邃鄭孔。以經爲郛。情律兒實。芝菌虎龍。灸景鍼芻。閎廓深遠。百氏環囊。九能大夫。子嘗稱言。經生偉人。昭代所儲。蒼萃著述。錄采梗概。以遺南狐。學核壇宇。治課常變。釃析而臚。子又稱言。文蔽也雜。詩蔽也誣。和易其體。篤雅其節。黼黻其祛。圭陰江左。謝華啓秀。鎔一鞠醴。欲剗橫流。自守宗派。以還古初。子惠淵懿。大直若詘。處愠以愉。子識卓絕。見微知著。能斷且謀。孝乎惟孝。惓懷故舊。不遺媯呱。弗籍貴胄。歷官清要。屢持文樞。沛然其名。上徹帝所。遠波扶餘。使尙待用。秉經達權。可公可孤。憶受知始。賞賦顏衿。詡論癡符。風雪清華。鐙火夜集。輒言媯媯。情恕理遣。標然靜雲。覆四座隅。十有八載。半以睽離。迂以闊疏。文藝寸長。差可表燦。子謹而譽。憂患疾痛。無可告訴。子聞而呼。旣畔函丈。昔昔夢見。猶憑竈觚。歸拜牀下。秋疾來宅。再革再蘇。不計生歿。遑恤貴富。紛紛弃帑。君子所息。全歸爲亟。不墮歧途。遺草一篋。枕鄰所授。弄之瓠壺。後死之責。刮劂流布。且鉛且朱。龍吉化矣。癯人亡矣。若津失柁。尊酒旣奠。靈風颯然。心光

如珠。小文譎劣。捧土益岱。但形其劬。有道之碑。鄭鄉之業。則俟大巫。哀哉尙饗。

祭宋芷灣先生文

於戲。太白一去。大蘇不來。天憫詩境。夷於委灰。公腹奇氣。如憑高臺。西摘落月。東浴蓬萊。化爲明霞。焜煌九垓。尋子詩境。非蘇非李。古與我合。我不古擬。超然之神。萬彙其始。猊門麟觸。霹靂操箏。捷若天馬。粲若媚子。秋館桂魄。春筵綺花。醇酎千觴。老手八叉。草聖詩王。公侯咤嗟。今日堊牆。明日籠紗。零縑碎楮。傳走天涯。爲名翰林。良二千石。才逸遇蹇。卅五通籍。使黔使蜀。文路大闢。滇官一紀。寂寞懷壁。觀察一稔。卽削塵跡。海內知己。靡不悼惜。歎聲所到。遂成今昔。澤入芸館。學宮體文。教之誨之。伊子獨勤。諗符而癡。滌蘭弗芬。人覽叱叱。子覽欣欣。謂我古賦。蔚跂不羣。袖稿款客。高吟入雲。遂令走卒。來塵大軍。人雅重子。信子所云。子不惜譽。溢其寸分。我喜且慚。歸求典墳。鄧林維流。何處置斤。子宦萬里。我返鄉國。尺帛不達。夢想卽得。秋遇如約。子北我北。嘉慶戊寅年公入都。澤亦入都。參軍之堂。元龍之側。之渙自倡。子聽嘿嘿。時鮑覺生先生設燕。招澤趨陪。座有陳伯雲。王楷堂兩先生。楷堂大聲。歌近作公。嘿爾而聽。燭闌尊冷。珠斗已仄。送子上車。微聞太息。前此三年。我使黔中。子時在滇。音耗偶通。子過且闌。貴陽省城。訪我所宮。我詢子詩。垂老愈雄。我乞子書。子曰遽匆。我敏子政。子謝無功。我偵滇吏。述子之風。灣甸有會。嘯聚羣凶。肝人爲餽。喋血成虹。武弁翼之。利其賤寶。大吏畏之。恐絆邊烽。子決殺之。苦無尺鋒。上掣其肘。旁縛厥躬。子憤成疾。勞心忡忡。急練鄉兵。讎會以弓。卒剗其頭。以祭沙蟲。曾否若是。願聞始終。子曰罷休。此何足庸。惟子宦滇。美政够夥。士歌民頌。溢于道左。小飲一霎。欲問不果。會有玉管。

羹待瑣瑣。我移沅權。子熒楚舸。同居鶉尾。乃遯蹠坐。轉粟天漢。風雨坎坷。歸乃疲茶。四末窳惰。遂令恆幹。爲疾所禍。跡子生平。大才觥觥。文能著書。武能將兵。未罄所用。以詩文鳴。不撫所仕。書日有名。神劍夫禱。三軍不驚。偶露其銖。萬夫失爭。子詩子書。自視甚輕。棄其胥餘。後學所羹。頎頎其貌。蹙輔而笑。穎邁其性。言簡以妙。似狂似慤。能忠能孝。都不經意。動中竅要。天懷散朗。或飲或嘯。一錢不選。萬卷獨校。我登子堂。未見與窆。多別少覲。遠邇相照。曾不邂逅。轉賀爲弔。西愚傍徨。如夜失曜。江山文藻。異代同調。遠致絮酒。願子速酌。靈遊靈歸。不閱嶺嶠。於戲尙饗。

祭家也園先生文

於戲。有古豪傑。起於新安。天昌乃名。不撫乃官。少而通籍。老而爲客。黃金山傾。所至削跡。早抱大志。恥卑狹流。文章事功。欲偃滄洲。當其赴前。不暇量力。衆詫而驚。自顧甚得。瑰意琦行。珍裘玉輿。神仙中人。出入閒都。獻賦爲郎。遂入樞密。兩轉銓署。屢讞刑律。英蕩所指。會雪厄冤。亮節清風。卻賄與援。熊湘戎事。枕戈磨盾。護麟符旋。左虎右隼。尋其才望。指顧九遷。忽漫投簪。弁九歸田。進避權相。成我高潔。退澣廁牖。二老歡悅。封公雄卓。其施恢恢。公纘厥緒。廈千萬開。銅陵金穴。非家所有。揮霍在卽。遑計其後。窮阨俚俚。來敏公門。屢貸復貸。公顏益溫。生死患難。錢通可轉。論公所掾。積無量善。尤愛端士。與羣雅材。旣瞻其身。復廣其裁。公性華逸。詞翰俱妙。壺輻一巡。絲管竝叫。意錢博籥。反雉擒魚。脫手忘懷。舉手笑呼。若公若侯。皆金石友。郎潛京輦。四海趨走。公不慕勢人。爲名高息影。江湖冠蓋滔滔。筵芳友萃。筵冷友散。再衰再盛。哀樂

參半晚學禽向與陶朱公。逋負益多。食客益充。吳楚遊倦。遂窺海鏡。粵都奇麗。雅合公性。瘴天如瘴。匪衰病宜。淹忽長逝。愴矣其悲。我祖高足。我父至契。我生公賀。宦邸連砌。我戲鳩車。公授我書。公賙我家。公體我裾。乾蔭既失。失母南返。我祖悒悒。公語款款。祖庭又殂。母憐其孤。公曰勿憂。此子易扶。我年十七。卽學公宇。與公仲子。鉛槧樽俎。我文無范。公誠其馳。歛而運鋒。公歎其奇。我屢計偕。公客吳會。不第公愕。旣第公快。我素食貧。奔走阻艱。公泣公歌。天涯水干。別或數載。聚不三日。念深緣淺。心勞夢拙。昭陽協洽。我使且蘭。逢公新鄭。大河漫漫。玉骨鶴鴛。雙眸鏡徹。語多恆昔。腸老愈熱。夜半涕下。曉來北南。人語喧豗。四目耿耿。我黔而湘。公楚而粵。風聽多阻。書問亦闕。公之貺我。山海難量。豈不思報。抔土太行。金河以南。別竟永訣。五嶺以北。苦失消息。出處大節。公無少虧。不附勢要。而戀庭闈。使公徇祿。久躋大府。定建宏偉。龍文虎武。公施旣博。不責人酬。酬者寥寥。天道悠悠。慈仁義勇。筆不勝紀。散在人口。著必良史。公有三哲。屢諫公歸。仲也最豪。博辨知幾。公志未伸。當有達者。我拭此目。以俟方雅。絮酒磨鏡。未能親行。哭寢有淚。激爲楚聲。光孝鑿師。華首葛老。求公於是。公跡未掃。於戲尙饗。

祭葆逸舟觀察文

於戲國隕良士。家失長者。問天茫茫。導以猶子。從以懿况。君丁厥殃。程書旁午。讞牘未了。爛難心忘。仲兄大賢。痛失白眉。老淚萬行。黔婁有妻。伯道無兒。後塵痠傷。君以孝廉。由國學師。爲禮曹郎。觀察東南。亦習皋蘇。亦宗研桑。際鹽法敵。帝命臺吏。改弦更張。鋒車星使。反覆詰難。君言甚詳。鞭笞旣得。錢流地上。利歸

海王帝嘉君賢移節歸綏長城巨防往者辛卯歲乃大水漂朱雀航沈竈產鼃萬民汹汹牽船望洋君勸輸粟彌夜達旦舌焦唇創抑鴻澹災誓波請命民用又康改秋試期士得平土不甞滸漭凡此美政大府俞之君實紀綱我爲寓公見逐波臣舉室倉皇君傲華墅委我驚魂度我巾箱旅客多戚君左右我使登達莊我性狷介曲意相喻婉辭而臧紅鄂破春素月行秋山明水蒼君歌我呼連輿接茵窮花竹鄉一味之甘十漿之饋必分而嘗送我北去天酸然雨離雲滿觴睽背二稔君來覲宸五柞長楊直廬岑寂溫酒相勞有鳴寒螿君顏益豐漆髯飄蕭甚口琅琅重話舊遊萍散蓬轉感時悽愴謂君邊寄建樹必異克柔克剛君言南中風物清勁每飯不忘西行索居黑水風急大青雪荒計抵秀容卽攝廉使其真未亡何來惡耗何疾殞碎何藥披猖走告諸受諸受詫疑瞿瞿俛俛君性篤摯情慤德滿薰然善良世宦熏灼尤所吐棄藐以迭邊訟庭花飛忽致雙鶴環君舞鵝周妻何肉俱可屏卻矧曰冕裳揣其襟抱清超曠遠宜壽久長視官甚輕必能宏濟爲儉歲梁胡天不慙折婁貞公悼盛孝章拙篆帖檀君所欣賞焚之陰堂小文弁陋庶無愧辭聊申闡彰數耶命耶靈其自知無任涕滂於戲尙饗

祭外姑劉太君童太夫人文

於戲痛哉二日不見疾來如風不語不食僵仆籠束胸蓄萬言口無一字百呼弗荅瞳目閣淚喉森恭尊半體遂枯心光熒熒乍有乍無投藥不入抵壺而嘆行就長夜何術使旦遇否身泰節苦境旨反覆不訓孰測其理請述母德孝於病姑姑臥三載昔昔爲奴以手掬穢以口哺糜頰吐卽膺頤指斯知姑曰孝哉

有婦若此。願爾女貴。得婿如子。先是外舅抱疴不瘳。金翦截膚。石銚煎心。肉徇九原。痕留一割。若有所待。隱忍生活。時女未晬。未晬而孤。卻顧女君。亦腹文珠。入地求亡。祝天得雄。兩念交馳。魂夢洵洵。子羸女壯。母意悵惘。均乳而食。冀子速長。嬌穉多眚。幾赴殤宮。就溼推漣。保此阨窮。家祀薦時。女君所治。佐潔蘋蘩。季蘭尸之。千劬萬辛。歷廿餘載。自後追思。若涉淵海。男賦綠衣。既授室矣。女卜鳳皇。迨其吉矣。孰可塔者。母心傍徨。擇到黔婁。不棄侯光。新婦來歸。我母悅喜。謂秉母教。婉孌循禮。母與我母。雅故既久。申以隼戚。益相人偶。槐榆橘柚。合爲一家。同上錦車。共走天涯。黔雲漏雨。楚風多暑。我母慰安。恐母意苦。我母數疾。殞殒不支。婦力弗給。母能維持。我母感母。若姊姊然。朝怡夕嬰。若蛩蟹焉。我母綿懃。呼母絮語。我兒我婦。卿子卿女。慈暉徂謝。阻艱南行。我哂我眺。母止我聲。我毀我厥。我鬱我威。宛轉相我。老淚潛滴。母家雁門。風高折弦。不耐溽蒸。愁縛痰纏。亦旣北還。一屋爲笑。後堂置酒。子舞婿蹈。玉雪諸孫。或戲或譌。梨栗繞牀。輒語歡和。愧非章泉。謬荷嘉譽。亦效稚恭。騎馬稱邊。健婦夫半。直廬雙栖。偶迓母軒。藻沼桃蹊。舊患漸痊。常膳載進。堦階驟轉。母意深慶。尺五城南。連字接茆。往來憧憧。如一團瓢。經緯周緞。庀我家政。先人後己。革袞崇正。雞鳴膺膊。烏尾畢逋。簪短帶長。撤榻且瘖。鏘籥如珮。筐篋瓌瓌。施杖安楛。必得其所。識惟卓犖。性復卹調。撤環拔釵。以惠惇嫻。昏黃鐙火。時話曩昔。金張門第。貂珥盈席。外舅雅性。能績能琴。母通弈旨。亦解弦音。投枰棄軫。舊跡如掃。息古井波。種拔心草。施藥拯急。已疾曷瘳。刀圭不聊。天道悠悠。有孝者子。事庶如嫡。知母乳味。悲母瘁力。晝夜不眠。求醫籲天。塔惶女癡。繞柱而旋。秋孟十九。斜月在屋。紉如二鼓。

婦孺咸哭年齒未耆旌封尙虛德盛運促慶遺子帑事起倉卒我懷怳惚謂母尙存誤敏母闕母憐孤稚安忍棄捐西風觸魂當亦漭然構疴彌酷繫思彌永來日大難不盡哀哽於戲痛哉尙饗

祭吳蘭雪先生文

於戲有美一人起廬鄱東以詩而窮以詩而通冊載大名海內拜風萃古今才擷其妙空清若浴碧冶若繆紅能剛能柔且逸且雄雲錦鳳羅天巧國工綺歲高步秀矚玉頰歡場醉筆驕花寵葉解佩漢神躡柳佳俠連手縈繞願執巾箠上公通侯以禮爲羅入拜後堂出聯玉珂華天雪宵奇峯詭波衆摹難工獨聆君謔神畫僧繇曼聲韓娥一座盡傾萬本萬螺或寫宮紈或織鈿窠零句碎章口熟巖阿曰竝世生柰此才何亦登遴選亦舉廉孝薇省端牘露門司教性非坦率遇每擗毳超超阿龍豈半袁豹斯人蕉萃識者私悼君懷豁如意不戀嫪其境彌窘其名益噪中山弟子擁書請造扶餘使臣聽詩踞竈聲譽文繡焉可戶告沛然有餘如響斯報懿哉前賢壇坫稱尊大波小瀾關學者門屢屨其閒君聞緒言同調蘭朋摩宰鯨鯢指窮爲薪似續斯文及君牧邊投老荒屯四海墨雨凝爲鬱雲槃敦蕭寥非君樂聞我齒廿餘邂逅長者見我塗抹詡以揚馬詫我博辨誣以終賈我詩舛律萬言灑灑拜君指擿裁僞親雅精心銳力奚事侈侈杜韓難真漢魏易假曰才學識獨具陶冶我名未顯君乃大評袖我拙草投人夜珠強聒使聞或否或俞我踐華近託於屬車君窺燕閒自佩一壺談啁醉歌月墜星疏我感曰風君助我吁我購鸞膠君貺以瑜我時奉母樞衣趨隅君遣魚軒蕙言姁姁珍膳甯餽必薦鯉鳧我即使黔客香棠館會書寓君吾見

亦罕。君後牧此。柯古香。對花豔豔。得句款款。答曰築巢。以寄漫爛。由黔使湘。由湘北返。別君六載。共歎
晚。憇暉隕矣。叫天莫回。扶引南舟。炎暑怒雷。君送我行。蕭寺夕來。坐不忍起。語不勝哀。僧揣友情。亦佐
嗟。嘆。冀訂後約。何年何地。遂成長訣。豈所逆計。庚寅之春。君赴所治。颿拂吳會。屢遣詩騎。我客白下。命駕
未遂。此後五載。若背風翅。夢旣艱到。書亦馳寄。聞君措施。大有賢聲。千室鳴弦。百夫得情。文黨設堂。龐參
卹。嬰敦厚溫柔。詩教果行。命不襲黃。壽或眇鑿。噲老益工。弗令吐傾。梅景蓮花。蕭返蓉城。君福清逸。名山
幾遍。滌筆匡瀑。大雲罨硯。久宿江洲。梅月如練。有隨清娛。玉貌盛鬢。郎吟妾繪。淋漓東絹。惜哉早化。如露
如電。昨接手畢。深慨杏殤。一官瓠懸。萬緒茫茫。我徒依君。曰銀河張。惡耗遞來。謂君坐忘。懷任彥昇。哭盛
孝章。名輩漸稀。詩道其荒。丹旆東發。火澌塞航。靈娛或來。垂帶相羊。天末故人。泣奠一觴。君知不知。憑此
心光。爲傳志銘。後死所詳。轟述大招。臨風慨慷。

祭曹文正文

於戲。元老耄。夙夜盡瘁。心景其淪。帝乃震悼。曰腹心賢。曰股肱臣。前此數日。猶奉尺一。劔劔恣恣。如何
不愆。精爽銷微。寂無嘯呻。月正三日。李將旦南。有聲鏗訇。公歸上霄。朝野皇然。失一正人。泉壤之衷。灼知
惟聖。篤信惟聖。守道不移。心無偏曲。特諡曰正。伊公學術。本末鉅細。一主於敬。懷繩準鈎。執符明燭。亢鋸
之柄。顧善輶晦。不露厓岸。莫克窮竟。惟聖督之。獻可替否。昭肆而諍。兒和辭。不語不辯。粹然雅性。惟聖
覺之。弗辟嫌怨。專抑浮競。明光若禊。奉魁承杓。十有五年。參贊膺勝。縛渠龍沙。圖像凌煙。簫勺靖矣。動合

機宜。山陬澗壑。練習掌故。觀畫清靜。大猷炳焉。一覽優記。至耄彌彊。封章委闈。雞次豔如。占對不窮。皇心慰旃。依之違之。左右綏之。以壹衡懸。無笑噴迹。無激揚語。而能得賢。頻頻鸚斯。求比求繫。望風而還。端委立朝。正容悟物。中外肅然。身仕三朝。徧歷六官。相廿三載。以文起家。以惠濟美。以才展采。羣經背誦。諸史括記。體用攸在。篤筆醇雅。弗啖時好。聯鼓貫珠。最樂商藻。鱸膺隻字。夕炬起改。誕章譎觚。崑瑣回穴。謝以不解。五典春官。十持玉尺。金鑄四海。方聞槩人。趣公所尙。咸入模楷。文軌既正。道源所繫。以建真宰。惟勤故敏。惟儉故廉。惟幾故深。尤慎操履。舉無口過。靡瑕可尋。時際堯舜。寵重恩厚。鑒此蕙心。公益奮厲。深援安危。思融古今。一言一策。未緒未達。反還酌斟。條宜事比。必聿必釋。犯星以辭。惟天聰明。惟臣莫及。敢竭棗忱。綿懼之際。猶念朝政。誦誦不禁。溫綸驛申。任子增秩。公感何若。經被覆躬。珍瓊親體。公憫何若。親臨未臨。天意愴然。遺奠三爵。留此耿耿。眷顧愈厚。思惟莫度。歎聲所屈。爰自廷府。以馳荒朔。曰社稷臣。百齡何慊。九京可作。公於先子。結肺附契。爲金石盟。我辱公知。于彼生初。先試啼聲。婉孌近親。崇重道誼。相胥而成。不干以私。不逢以喜。愜公素情。悠悠蒼天。栽植之力。推置之誠。亦旣孟晉。曾不計酬。抔土太行。師哉師哉。桐子謾訑。日卽跼傾。憶公溫溫。若氣之春。百昌咸起。去尤見思。若燧厚夜。若筏困水。生加太傅。殤諡文正。哀榮極矣。靡不撫慟。靡不賙禭。自當宁始。功著旗常。慶流苗裔。神在典祀。大文清詩。雉雉麟麟。充棟盈几。千載而下。測公笑兒。惟憑故紙。椒漿空奠。齊衰不御。悲哽曷已。靈風滿旗。大星如月。公其格止。哀哉尙饗。

祭曹文正公德配劉太夫人文

於戲文正返眞。甫祺薦常。奈何斗嬾。冥隨隕光。亦有少室。峯積尤亟。逐岱雲化。距四挾日。月穀歲旋。哭寢者三。藉謂純終。送者曷堪。惟我女師。婉婉德象。以節度息。作嬪丞相。爲曹大家。爲劉令嫺。明月采筆。天風佩環。節度偉人。母乃馮媛。濡染禮教。廣聞深見。左右文正。垂五十年。黻佩有道。海內稱賢。綠輿在門。黃裳之偶。大帥竿牘。望而卻走。闕觀狐趙。山公之妃。辨才與量。識幾燭微。詎特內政。修尼井井。亦轉風化。亦賴戒警。先是司農。奉九旬慈。春暉盎壺。大雲覆之。母以孫婦。逮祖姑事。頤指目矚。動輒承志。戴星劬劬。煩摺織紉。孝溢鄙譽。喧傳迄今。我嬰倪時。隨母拜母。繞牀梨棗。嬰春消九。我母契母。歡若後先。傾吐肺附。情緒眇緜。載乖載合。修哀條樂。我母前逝。母意殊索。我娶於金。繼室以劉。母甥母姪。唯母噢咻。絳帳生徒。後堂弟子。師恩母慈。涵泳無已。受性寬懿。秉心愷勤。不貴華靡。獨崇誦芬。通知大義。亦文亦史。蘊才不露。愈襟淵嫩。金幹玉楨。八爵九華。興慶首行。榮顯莫加。蘭時內集。屏謔深燕。林林蘭玉。雍樹負劍。族嫺燦燦。羨母福完。祝匄母福。百分一端。母曰茂哉。網掇錫類。宜勗子姓。以紹門地。善容仁氣。藹如薰風。旁颺曲吹。感及媼童。鳳靡鸞鍛。中懷茹苦。筠心瘁矣。豈待淮雨。尙憶昨冬。計及崇祠。師入賢良。母實尸之。無成代終。賴此朗識。警欬在耳。若前日事。師未卒窆。僕母歸乎。春水方生。又送靈臚。惟子孫曾。彌賢彌俊。足慰慈望。金策玉印。念及小己。於真冷時。哭奠椒漿。靈其鑒之。哀哉尙饗。

於戲鳳集彙華。海內文明。所過謹諄。願聆其聲。亦有神驥。力竭猶騁。仆於長坂。見者哀哽。豐遇嗇筭。逃哉天聽。夫豈偶然。抱道翊聖。君如鄴侯。如員半千。生而慧成。幼卽頤天。千詩百賦。借書于手。文采必霸。歎欲萬有。掇取顯第。若探筐篋。抑然自下。不侈形謀。歷涉華近。鳳閣樞垣。黼藻卿雲。懸河筆端。益習經史。通知時務。雷聲淵默。攬轡四顧。成君盛名。則守思田。如搏丸泥。指掌方圓。以渠龍骨。則稻再熟。以典雞次。則戶勤讀。百鼓統統。盜革而徂。萬廈潭潭。士晏而儒。始是瘴深。不覲聽馬。父母在庭。瘴亦消治。始是咫尺。聞耳塞目。督良師道源。見學海瀾。貿貿提陀。精夫缺徒。養印自充。仁僂禮趨。銅鼓應桴。鑛礪錯采。陽明再來。辰在戌亥。閔古阿孀。陽明再來。具開創功。惟天下才。展君領聞。則權巨關。船艤子徠。鏡燭吏姦。決鴻害稼。臥隄請命。君盡止之。弗垂奚病。湖波寬緩。堰虹穹然。全生澹菑。蟲人萬千。權桌平亭。揀荒如火。種桂不齊。生計遂左。一歲再莖。見賦吳都。爾則聖土。吾能障湖。柰何賦重。生金生粟。圖始實難。試視粵穀。政和特達。有遄其遷。都轉山東。借寇潁川。平江練湖。俟君盤錯。遂羈淮海。紛攘六鑿。百齡俄頃。牙淺弦疾。心光如月。已迫消乙。君常稱言。以古爲師。破萬卷書。實爲政資。朕黨儒效。后此性真。先教後刑。厥化若神。君樂山水。騁鸞跨鶴。褰帷清暇。觴詠閒作。江淮東匯。方聞所都。偉哉主盟。比韓歐蘇。憶同譜歲。君甫十八。外溫內服。丰儀俊拔。二十歸娶。花月萬篇。廿三典試。章貢多賢。強仕過三。如日方中。好作功名。圖磨卜熊。未聞臥疾。遽卽長夜。天球中碎。國棟折下。翹想舊部。哭呂衡州。橫江池南。溢湘灘流。悲感所集。定謀尸祝。殤爲貴神。上動瑄宿。箸作藏山。喆兄哀之。身後千秋。營魄戀斯。椒漿泣奠。銀灣側畔。靈風肅然。助我三歎。哀哉尙饗。

大清武德尉四川建昌營守備王君及其子武義都尉貴州思南營遊擊忠節誄并序

乾隆三十二年四川建昌營守備王君呈瑞偕守備馬子健隨遊擊蘇爾相素克津泰入緬責貢以降聞於朝於是籍武德家獄其孤宗佑又十年遊擊蘇爾相遁歸白其事於朝曰蘇爾相囚素克津泰縊王呈瑞馬子健死于江皆不屈也於是官宗佑以完其家實爲武義君又十八年武義以清江營守備將兵黔楚間當苗衆始立功尋以都司將兵剿教匪于蜀以遊擊將兵靖永綏又從征興義苗平之勞績無筭賞賚無筭然寢食戈刃閒凡三年裹創吮血虐以寒暑病殞死不支未嘗一日休也嘉慶三年七月四日武義在蜀營攻王三槐于安樂坪大軍失利提督死武義收散卒以寡搏衆身被數十創力屈伏地北面大呼曰不能報君恩矣遂卒於陳于是武德以忠節殉于緬其子武義以忠節殉于蜀前後聞于朝大白于天下嗟乎奉使貴不辱命降不可也雖不死可也使武德不死與蘇爾相遁歸雖至今存無益也武義艱于獄勇于陳屢立戰功富貴而雍容雖白首統戎行可也然觀其戰先士卒篤病不少懈其心以爲彰前名報國恩出萬死不獲一生可也夫忠節天之榮名也其父取之其子又取之奉使臨敵人臣之太端也其父緬頌之其子蜀頌之太平之時而以忠節著尤不易之遭際也天何厚于王氏父子哉武德故黔人官于蜀遂家于蜀之西昌武義官於黔葬於黔復家於黔之思南武義子振基廕雲騎尉清慎有家法介安化令朱君以文請澤謂兩世忠節宜誄也其辭曰

武德矯矯握節不屈魂趨金沙心向丹闕萬里孤臣不求人知忽暴于朝天實爲之孤臣有子不絕如綫

拜恩儻爵臥戈枕劍。凡師之捷在義與勇。武義一呼。兵躍馬蹕。首首獲魁。積甲鱗峒。武義顧之。寵賚又新。先登陷陳。病困不已。生爲國士。死乃肖子。金夷重夷。有肉若糜。血碧蜀天。化爲虹霓。鬼雄南驚。直叩阿瓦。歸來歸來。同食方社。卹酒載清。豐碑峩峩。忠乎孝乎。所得孰多。朱波獻象。岷絡如井。如何琅邪。不幸斯幸。烏江熊熊。掌溪來同。忠孝之廬。千古以風。

王母朱孺人誄

龍憐之孀。未逾半稔。而孺人僅三閱月也。孫環之寡。先喪厥姑。而孺人泣三喪以血也。任妻之少。孤孩在側。而孺人若流星之忽也。然無子而有子。子立而家庇。抑何慈且喜也。晝室而處。瓶口而對。靡不禮以節也。閨門雍雍。內外斬斬。族嬋悅也。曰奚自奉之約。而與人則周。緯不恤也。穀似孝慕。我友王華字石甫以淚泚筆。寫老銀而摧切也。我居聖室。未表母德。叫蒼天而罔極也。

祈晴文

道光十二年六月十九日。廣東正考官程恩澤。副考官邢福山。爲久雨祈晴事。齋肅頓首。致禱於所過名山大川之神。惟貴神膺沈寢之盛典。董常羊之巨維。卷豐隆於掌握。起澣號於呵吹。故能沛百昌之沃膏。與五土之熾苗。今者小暑以後。高原旣滋。非惟雨之。又潤澤之。淺已徵乎上尺。下尺深復逮乎六施。七施儻霖霖之不止。轉損穀而壞粢。非所以體奧苑之仁覆。錫富媪之蕃釐也。矧使臣者。奉天畀之英蕩。併晝夜而載馳。歷五都四瀆。而不憚險遠。且欲度粵嶠而南窺珠海之廩。迫有程限。不可逶迤。頃行抵河涯之

閒閱數日而爲積潦所羈。靡變小瀾成滄。淪化平涂爲險。疢馬十步而九蹶。僕前進而退疑。廢食飲而忘寢。興會不半程而已。茶疲噫嘻乎。雲將雨師。豈不屑使臣而爲斯。使臣官不足重。材不足毗。特恐滄溥海共主之簡命。卽貴神亦以爲非宜。伏願速偃雨旆。迅收雲旗。消芒晦于俄頃。顯暈暉與夕曠。使臣御風而行。晷刻不差。納節之日。五善周咨。是時覩大穗。興長稔。亦尤後而登京茨。則貴神一舉而兩美備矣。使臣當九頓首而謝如天之祺。

第二次祈晴文

某等前次祈晴。僅告所過名山大川。不敢致禱天神。以天神尊貴。非大夫所當祈也。然春秋之義。王人雖微。序於諸侯之上。卽行諸侯之事。不爲僭。茲再禱風神、雲神、雷神。以達寸悃。恭惟天神宰制陰陽。迭用柔剛。曰雨而雨。曰暘而暘。今者二旬不見皎日。厥咎常陰。厥過流溼。瞻彼大田。其患惟潦。哀我征人。復仆于道。懷私爲每。此懷非私。瓜時而往。瓜摘乃遲。使臣之心。曾誓河水。斯文未喪。宜受帝祉。帝祉伊何。所助者順。霖止潦清。乃利于進。伏陰伏雨。有干赫曦。孰綱維是。而令怨咨。侏夫雖微。曾拜帝命。惟神聰明。有籲必聽。

謝開霽文

夏閒過宿州。值霖霖不止。作文祈晴於所過名山大川之神。不二日而開霽。茲復過此。作文祇謝焉。

翳使者之南邁兮。值霖霖之淹旬。懼程限之孔迫兮。路坎輾而逡巡。乞明神之嘉惠兮。叩喬陟與齋淪。惟
濯靈之桴應兮。發勁颺於九垓。耀赫曦之烏羽兮。卷水雲之魚鱗。前金蛇而後玉虎兮。皆遁藏而不敢伸。
譬震怒而忽霽顏兮。非神力其孰振。喜征蓋之不濡兮。快劇驂之可循。爛川涯之媚晴兮。斂山翠之久翠。
幸數日之偶開兮。恐後途之仍屯。何明威之廣覆兮。隔千里而一均。計自淮甸以達海孺兮。無怪雨之或
津。頃使旋而納節兮。嚮周原之駱駟。過符離之古城兮。心惓惓於貴神。忱止寸而恩倍尋兮。雖巧言其曷
陳。冀蟲鳴而天聽兮。燕眞香以上申。

程侍郎遺集初編卷十

曹太傅相國八十壽文

聖天子御極之十有四載。時聖道淳。六寓晏然。仕歡於朝。農拊於田。於時我太傅相國老夫子位台鼎。凡二十二年。領樞密。凡十有五年。而齡躋八壽。丹顏而華顛。天下望之。如周召公。如古彭錢。豈不以身繫社稷之身。齒冠中外。僚采之先。故介福者同辭。而冀劭德者彌堅哉。聖天子嘉乃元老。訐謨丕績。親灑丹毫。寵以得賢之章。書額書楹。祝期頤與康彊。大賚珍異。器重衣華。金朱煌煌。若湛露之滋鄧林。赫曦之耀扶桑。宜其奮榮揚輝。日引而月長也。十月幾望。歲星在畢。五老人正中。天使乘雲繞月而來。賁乎公之宮。南面磬折。祇述天顧之隆。公九頓首。九命茲益。恭捧盈而翹躬。自上公通侯九卿。以迄庶官弟子。門人莫不觀盛禮而快寵崇也。酒行樂作。或舉觴而言曰。自某處公門下。見天使凡三至焉。歲在甲戌。公六十壽。拜渥恩於逾格。實臣工所罕有。歲在甲申。公壽七旬。如初之禮。卽肇今之辰。自今以始。且屢荷天之申。豈云三錫而未之前聞哉。故語體兒之隆。則玉瀾繪像。宸章鑄焉。紫閣圖勛。御贊縣焉。青花龍尾之道。易腰輿以肩焉。舉輿服之貴。則翠羽吉光。重暈圓焉。乘馬吉黃。紫纒翩焉。其它殊恩異數。玉管不勝編焉。盍推致此之繇。以麗乎座賢。或舉觴而答曰。公以世祿鼎貴。致身清要。詩禮之氣。盎乎廊廟。書誦三篋。而不遺一字。文約六經。而下筆典誥。抑譎觚之詭詞。倡和平之雅調。用能潤色鴻業。概括雄稟。是以玉尺凡十一持。

而五典春官門生遍海內。皆酌公之辭波而不敢溢其瀾。至於總錄館。裁史成。領東塾。直西清。掌翰苑。則抒揆天之藻。侍講筵。則聞說經之聲。而贊機務之要。尤爲絲言出納之所程。是則公之鴻才。蓋濯乎銀潢而愈明也。公徧歷六官。六官之職皆舉。謀謨密勿。千端萬緒。若經緯之在杼。皇武旣布。干羽屢舞。上安下禔。各得其所。且也公昔以參知政事。未三日而拜真相。今也加太傅崇銜。冠公孤之上。荷三朝知遇之恩。協百僚多士之望。然則公之鴻才偉略。其可度者。在守正持重。其不可度者。則密對與帝。既也。然而智蓋一世。材總四海。名宰相之才也。略也。其本則基乎德。公抱忠孝節廉之資。以敬儉讓咨爲之式。少性恬退。絕權貴之謁。長益勤慎。勵堅貞之節。事無鉅細。一主於敬。閭室不欺。若對天與聖。平一己之好惡。以齊人之好惡。故有公非公是。而無私喜私怒。不激不隨。一趨一步。摧疊機於將萌。培元氣於已固。能使于于者視端行正。來同我蕩平之路也。以儉表率。非它一家。以讓風世。自無人加。故實是咨。聞善拜嘉。仁氣煦言。如春在花。以是服官垂五十年。無纖毫挂於過差。尤可異者。聰記彊識。善斷與謀。深自掩抑。如被褐反裘。卓識遠慮。洞微燭幽。載其清靜。而廟堂旣修。惟聖天子察其單心。許其同德。獎以正人。覺試之而愈優。祓之而愈新。故寵眷稠疊。不可涯。而祿祉履戩。以莫不臻也。加以耄期守學。彌敦攝固。不懈以久。建九紀以立純德。以上登旗翼之壽。晉語云。惟德厚者能受多福。揚子云。壽可益乎。曰德是則備三達尊。膺九五福。其爲德之困乎。內教修舉。子貴孫賢。其爲福之藪乎。合座乃舉醕而頌曰。古我睿聖武公。年九十五。猶箴儆於國。屬誦志之我補。亦有甯川羅侯。領三十六曹。年百二十。猶精爽而不憚勞。亦有潞國太師。年九十

餘尊德樂善。雍容玉除。願公勳名。媲美潞國。壽考齊乎甯川。而持盈捭歆。則如睿聖武公。益惑益虔也。

王子吳鼎匱銘

虎阜寺寶王子鼎。吳乘失載訪者梗。程孟聞自梁子偵。洪季陳仲據几省。古翠欲垢灰未冷。捐灰滌翠吐金景。梁子且詠且話訂。龍龕攝提斗子柄。陳仲作匱閉深覲。作銘者仲篆者孟。王子有知定首肯。

面東西晷銘

此器初於齊太守彥槐。張大令作柙。然自午初至未初無景。是一大病。因與吾友鄭澗。菴謀而補成之。

非鏡非臺器圓靜。節綫晝刻畫以鉦。欲平其地足仿鼎。可升可降極度等。東表東景西西景。日中無景何以省。乃規缺月弇其頂。頂有小竅透光罔。方中方睨定俄頃。槐柙所遺覆而整。

爲張石洲篆薦雷書屋額并系以銘

洊雷之洊無不載。洊至作薦干所會。通震以坎皆詁再。恐思修省乃得貝。文孫識之祖語誠。

晉靖王寶賢堂硯贊爲張石洲作

辦厥首印不辦厥足。舂然蟠朽鈍以齡身。流水有光宜受別墨之黔。吁食其墨則贊三兆。吐其墨則揆聯藻。無焮黃之祓而有草元之擾。清事賢邸弄以密。銀河張宿寶其出。甲子五光兮再見天日。

祁淳甫食筍齋圖記

南湖之北。樂泉之西。有食筍齋焉。不由旬廣而幽徑。諝襍無辨。華飾而洞室。燻閭雲歎西東。山影黝庭。月貫表裏。水光鏡戶。加以來風防露。翠溼暑人之裾。冒霜停雪。碧成冬士之屋。小堂佇軸。文石如掃。得非李

藥師所問訊。王子猷所嘯詠歟。時則有尙書黃夫子。承北門之旨。繙東觀之籍。羔羊委蛇。魚鳥聳耳。植援激水。編町成篁。酒澆茵墮之繡。墨寫升斤之影。蓋十餘年而竹以森焉。亡何尙書請老。衮衣遄歸。學士其興。簪筆能舞。良夜成韻。則犁然當心。曾火競蠡。則率爾步往。或擇迷醉而補植。或見獲筭而翦拂。荏苒有年而竹復茂焉。且夫詩詠筍藪。禮重落菹。浮亞之旨可珍。日華之胎以淪。羊奚不孳。毋棄青甯。此本義也。八十之策。乃蕭爰所爲。兼兩之載。亦汗青是削。齊簡曰等。讀書曰籀。靡蟲不傳。搜之羽陵。此進義也。尙書味道得腴。學士食字而化。波瀾莫二。屬尾相仍。洵可謂水有異味。識張陸之曾居。舍開三徑。待羊求而杳至矣。況士林之館。藥院之廬。樹分五柞之蔭。泉挹九成之醴。孰謂是竹也。非浮筠之幹。截之仙山。嶰谷之產。集茲鳴鳥也哉。澤十稔移中。三宿桑下。昔栖西舫。今作東鄰。猶憶尙書居此齋時。展瑤局。開芳筵。縱露初之觴。發華始之詠。錦被之策不噴。宮袍之奪必賞。今則叢蘭之宅。越在天末。王室之彌。懸乎夢想。懷遠感舊。我勞如何。幸也。其替人則黃羊大夫。其轉徙則碧雞才士也。說者乃曰官廨也。遽廬也。自有此屋。歷有多賢。奚視爲甘棠之宅。作爲瑞室之銘乎。然假之丹素。不能壽其狀。形之歌詠。不能寫其神。則無爲貴知矣。故疏房椽貌。不必一再居。冠倫魁能。不必先後聚。碧鮮玉潤。不必月日蕃。圖之詩之。雖風牛異轍。歲節殊候。而一寫在握。卽千載猶面也。則謂此圖爲藏山之臥遊。激懷之故事也。奚不可。

任階平太史寫經圖贊并序

階平先生博關羣籍。江廡衆言。旗角繫鈴。已踐舊夢。樹墨記柱。尤傳家苑。惇愛經典。勃宰故訓。以爲巾箱。

之妙。非賀玠所識。蘭臺之私。必中郎乃徵。粵自開皇廢像。長興雕本人。無書掌之瘁。世乏壽胸之雅。况血剗易滅。記珠難索。天口聖譯。日付苟簡。良可歎也。於是火鈔雪纂。蒲荒柳剝。隆古言凡之概。方聞申難之喙。一經寫定。盡歸默識。爾乃龍伸螭屈。爛兮典寶之奇。紉紅許綠。茱諸虎帝之躋。蓋惟用志不二。故能與皤然者爭年。課功必藏。故能與鬪然者比遇。柳氏自備古美其稱。雲禎細書。今尙未輟。至於給五千番之麻紙。以招俊乂。酬十五年之嘉績。用錫金紫。則稽古之榮。諒不越習者之門也。爰爲贊曰。經紛綸兮井六春。心若醉兮手之鶉。是副墨之子兮。是雒誦之孫。

藤花唵館記

藤花唵館者。梁茵林方伯少時所觴詠地也。楸槐貴里。檉柏小眠。元瓠屯雲之勝。屋山隨月之讀。墨雨所瀋。池飛墨蛟。寶帚所擘。牆剝白蜃。鏡瀾倒檻。聞策策堂堂之聲。蚪柯負字。作瓏瓏壘壘之狀。宜乎雪松大培。沈東陽撫之長唵。晨霞采鳳。李贊皇思而寄句者也。亡何。西向一笑。東巒遂荒。禮星師子。爰題秀實之居。龍原書窟。頓削關西之跡。而先生方入侍鸞掖。出操麈符。不特申嬰室之謝。抑且乏孔席之嘆。周捨赴官。以荻爲障。思光東出。居舟非水。是則羅君章之蘭宅。元貞子之回軒。亦可遽廬視之。逆旅唾之矣。然而向子思舊。圈生多情。滄波一蓋。尙奏竽於故巢。石牀雙蹠。未淹蹤於闌雨。憶筱中九夏之飲。緜桑下三宿之緣。輒未免池夢惠。連磬戀光政。釋碧激瑤翻之句。則絳園在前。廣莫泝竹里之章。則輞口如見。此援成瑞室。所以刻鍾嶸之銘。而彙題浣花。抑以述端己之志也。更有進者。先生胸具萬閒之廈。而足繭長梁。才

同九州之被。而心儀環堵。缺十住南還之斧。聽士池西潦之聲。韋傳則僅賦鬚茅。友讓則未謀贖券。以故疏房椽貌。偶托畫禪。積金連石。未邀仙賚。求之華廡。尤所難能。澤緯蕭已破。靡滓無定。邱亭爰止。皋廡暫棲。每入白鹿之員莊。過青楊之蕭巷。輒作十日思焉。何況甘棠五畝。緬雅興於謝公。竹林別室。涉芳年於遵彥。它日樊川墅築。淮水齋成。賜大官尊。賭奇礪石。花竹秀野。水木明瑟。意將以此圖爲嚆矢乎。儻用小文。再泚秃管。

陳芝楣觀察傳硯圖記

傳硯圖者。吾友芝楣觀察。哀其兩世清德鴻筆。而以文之綸附之。龍虎變化。鸞鶴停峙。兒其神也。星涵玉李。雲暈火纈。肖其器也。至於仲興無忝祖德。超宗殊有鳳毛。垂元珪之豐髣。挺匿犀之異表。匪惟繼美。實能亢宗。而且青鐵未敵。黃丸載波。產天人科第之芝。博尙書僕射之號。柳誠懸所寶。惟研。丁公雅傳之其裔。古有其事。今乃過之。緬惟尊大父成都君。惠雨浹於參墟。英風被於井絡。祀赫桐鄉。神囀羅池。宜其五色錦衾之雲。覆諸筆海。三躔次月之影。落我石屏。胸羅手摘。逸氣可想。尊甫宣城君。學旣博奧。書復洞精。擣玉帶一角。磨盾鼻三斗。而油幕蓮冷。廣文氈寒。笏甫拄敬亭之雲。頭已傾江令之雪矣。雲封凍結。有深慨焉。至我友芝楣觀察。清節內肅。仁風外暄。名達華近。得元才子之目。澤洽州郡。接顏有道之稱。唵弄風月。則呼泮妃其神。講論道惠。則置俊人於側。比者乘虹月之舫。握英蕩之節。露夕花午。神怡務閒。藏孟公之牘者。囊垂索智。永之書者。柎折結鄰。常御磨穴益深。石言若曰。是所謂副墨之子。雒誦之孫。使龔我若

白科亦無悔也。夫惟范馨之硯，傳之伯孫，而孝行以著，端明之硯，字於老泉，而文祥以顯。我友應升卿之兆，傳扶易之經，文則檜日樵雲，武則飛章草檄，是以忠貞之子，復爲司隸，清白之後，仍生強項之才。之望乃光於家，且卿且公，無愧於長。況復鐵面傳世，鳳味有朋，聚之一室，比太邱之德星，寶之百禩，等文貞之棠笏，不特學弓學冶，湖義門之高蹤，抑且如風如錐，增硯譜之嘉話云爾。

謝俞陶泉太守餉車螯啓

江干嘯噉，堪供中御之拘，酒畔蛤蜊，屢折元長之對。乃蒼水元夸之忽至，引白中脆尹以偕來，自解箬箸，欣看礪砢，素膚勝雪，比移角而能端，紫殼騰花，較姑勞而益厚，醞釀寒潮之味，銜訝新火之光，當齒卽消，點湯欲化，何如北海醇醲，含不雨之漿，藉甚維揚，甘臙啖二分之月，豈意破十城之蜃界，致千里之鮭珍，情深安邑之豬肝，貴壓屬州之蚌醬，僕心慙劉洪，議徇鍾阮，北山之隱士方饑，東海之波臣難托，珠宮新沐，載廣楊萬里之詩，翠釜初烹，敢拜王秦州之惠，每當充腹，輒切銘肌。

謝祝蘅畦同年惠果子狸啓

綵絲繫臂，方當烹鷺之辰，篋絡纏身，忽覩懸貍之狀，喜君以狸首爲節，使我操牛尾而歌，爲問肌膚大雪之凝，都緣梨栗霜天之飽，並頒筍腊以佐肴烝，白似截肪，與花豬而競美，香能醒酒，比竹飴以尤甘，弟前處鄉關，曾驗汪龍溪之對，茲來京輦，又應管公明之占，夢殘形以載興，去正脊而猶緩，況逢五月重五日，得此八元第八之才，謹當封以糟邱，薦諸鶚炙，良朋高義，深憐鮭食之貧，晝寢朝餓，敢報荇肥之帖。

謝王都轉餉果狸啓

俎肉已殘。方續曾參之操。時汪都樓致果狸已食大半。篋鉤乍解。復賡侯氏之詩。三人執牛尾而譟。一笑脫貂裘而換。肥白如瓠。豈柱下之相君。冰雪其肌。類藐姑之仙子。鸞刀載削。瑤飴初蒸。聚空山百果之菁華。佐淺酒一樽之風味。膏流簞屨。似給事之裹熊肪。品極芳鮮。等孝儀之夸鹿尾。君從何處。致此不來。儻搜之灑霍之旁。曷置之糟邱之側。特蒙推食。彌切朵頤。獲珍有勝于三狐。競爽奚慙于叔豹。風林露圃。請吟楊萬里之章。沙地雪天。轉憶洪容齋之對。拜嘉貺。賜識愧。牂生。

賀喜雪啓致陶宮保

禱霧豬泉。已覺天慳之破。斂銅駝穴。彌徵地寶之呈。四民盼五穀之精。連日得六花之瑞。伏惟宮保制府。雲汀先生。時暘時雨。已溺已饑。文昌之馬才過。希逸之衣旋溼。推發粟振裘之意。挾纊三軍。啓惠禾多麥之祥。賀書五版。鋪來木屑。桓公之高會初張。掃入茶鐺。秀實之清風可挹。縱春旗之簇簇。猶臘鼓之瑟瑟。憫下尺而久譽。卽封條其何礙。某倦從袁臥。嬾藉孫書。六朝之山色如新。九陌之車塵不起。因憶聚星堂上。仙官賡白戰之詩。定知堆麪井邊。野老夢黃雲之稼。乍嘗甜雪。載詠甘謠。

謝俞陶泉太守餉蚶啓

暖據竈觚。方欲致刲羊之祭。時十二月二十三日。寵頒魁陸。幾疑開駭鹿之山。列瓦纒以參差。疊錢文而匝匝。珍同天巒。甘號蜜丁。一箸探紅。湯沸春風之萼。雙房釀紫。酒淹明月之光。當海天欲雪之時。正沙艇烹鮮之日。

然必瀾江東去。始蓄寒苗。嶺嶠南馳。方登諫草。若教寄遠。定致役郵。何期淡然子。專車而來。一似左元放。釣鱸之術。對茲璀璨。彌切夥頤。外形未折。夫眉渠內。味何虞其醬。更自哂者。物非混沌。人實饕餮。芳鮮豈白。蝠之遺。呀呷類青郎之囁。比馬甲與章舉。君尤嗜南食之奇。持羊酪喻蕪羹。我亦守北人之學。昔也珍貽若士。曾一修化雀之箋。今茲送自右軍。並得寶噉蚶之帖。血營受益。心版堅鑄。是所謂一味之甘。必剖而分之。百朋之錫。方斯蔑如也。

謝汪均之餉鹿尾啓

樂章殘缺。方賡狸首之詩。時汪鄴樓兄所惠牛尾狸已食殘矣。禮注分明。復講鹿痿之法。何來大尾。用佐遨頭。爛斑垂蒼玉之綬。圓湛截丹砂之柱。既見珍於鄴下。更遙闕乎遼東。故因大惠之休明。能致遠方之瑰異。操刀未割。感君憐爨下之桐。承筐是將。引我寢隍中之葉。事類拜王公之塵柄。情同餉茂先以龍脩。定知卓帳筵開。空矜舌醬。兼笑采薇客倦。徒飲乳潼。角邊之瓊片難餐。頂上之珠華比貴。惟丁子之獨有。實苜蓿之所無。正欲敏醫氏之門。廣岐書而作宴。何妨塵太保之閣。撫顏帖以裁箋。象約同甘。牛心等惠。

滄浪來鶴圖記

攝提之歲。圍陽之月。逸舟先生再權廉訪。寓吳門蘇長史之別館。簿領之暇。耽玩水石。時則雪絮將沍。風枝自鳴。昏雅畢逋。莫雀噤呻。有物飄然。降自霄漢。元裳縞衣。昂立庭除。先生心詫其異。目快其潔。且恐俄來旋去。不須臾而海天日域矣。乃復儀態閒雅。不驚不慙。仰喉俯啄。若習安焉。不數日。先生有權江寧方

伯之信。買艇同載。撫翎而還。識者謂巢穴測天。禽鳥驗氣。則夫冠雀栖宇。三台其徵。靈鳥滿戟。屢擢不次。矧銜類。燕膺鳳翼者。貴冠章服。舞儀相庭。識字含珠。尤絕羽類。知生祥下瑞。將無已時。而某竊以爲一雙入雲。非隱弗招。二八集扈。非聲不感。使子游之門。如市元規之塵。汚人不歌舞闔咽。卽竿牘紛擾。唯鶴實智。且避之不暇。又安望其擇木而止。僚山而歸耶。是則能致鶴者。先生之抱超乎俗。能調鶴者。先生之才餘於官。訟庭花落。閒階蝶翔。可以想風儀攷政治矣。諸君子皆樂道之。繪圖繫詩。而某爲識其事。

人日游龍樹院詩序

粵以翦人貼帳之日。登高賦詩之辰。欲作海王村之游。以證輪寥館之事。而宵雪嫫嫫。朝霧譁譁。甚妨東郭之履。無假北闕之步。於是簪裹旣集。舖歡其闌。臺如重壁。有作屑竹之庭。麩堆金井。彌懷暝寒之徑。乃策疲騎。聯高軒。徘徊乎鹿王之宮。頓憩乎龍樹之宇。虛室生白。小窗多明。遠眺五陁。則擁絮酣臥。近瞻萬雉。則界墨益顯。重柯者句喬之木。疊帶者紆曲之塗。掩九秋葦華之影。破蔽空烏羽之墨。俄而寒吞落暉。醉紅千里。清挂弦月。深白一色。漏鼓坎坎。寺鐘沈沈。疏星燦銀。斜漢絡玉。混茫天接。如泛烟江之濤。回旋地空。似入水精之域。尤可快者。煦春前屆。良夜已暄。苛謝觥籌。笑縱談柄。陶陶焉。衍衍焉。揚今摧古。賞奇析疑。膏以繼晷。不知其劬茶也。嗟乎。江關梅信。卽在琴尊之南。上元燈火。又繞星辰之北。海王村之游。新霽少人。尙可約焉。坐客吳荷屋中丞。工詩善畫。許繪一圖。蔡友石問卿。梅伯言郎中。張石舟大令。俱工詩。皆有佳什。是則幽蘭儷曲。各騁妍祕之詞。山陰鼓棹。聊乘倏忽之興。爰拈拙筆。以備引隍。道光十有七年。

丁酉新正穀日。歛程恩澤撰。

修篁墩世忠廟啓

古之君子。將營宮室。必先寢廟。吾儕小人。皆有闔廬。以避寒暑。當春秋之匪懈。正霜露之既濡。使旁風上雨之不支。對澡藻寶蘋而有作。此新宮之暨茨。與守祧之修除。爲最極者也。我世忠廟者。賜額於大宋。遷基於有明。規撫自程聚而來。棟宇在篁墩之上。雖蒼楹弗聖。儉有契乎舊章。而茆龍更衣。葺必勤乎後嗣。仰惟我始遷祖太守公。仁能撫衆。如朱邑之祀桐鄉。我忠壯公。武足禦災。若李冰之射江水。有功德于民者。國家禮亦宜之。況我子孫。念厥祖考。凡神靈翔泊之所。皆寤寐經營之區。必占棟隆之吉。而後卽安。倘有棟崩之虞。其將焉仰。嗟乎。服先疇。食舊德。叨福蔭者。二千餘年。備鼎俎。陳犧牲。薦明禋者。四十八派。豈無富室。傾千金之橐。不爲多。亦有貧家。獻一斗之粟。不爲少。譬之揀堂上之疾。雖刲臂其何辭。醫眼前之創。縱剜心而弗恤。惟願我同族諸尊長諸先生。本仁行仁。見義集義。醜青蚨萬貫。得大木百車。所見有烏有。榘孔曼且碩。不礪不石。修舊曰新。天之所支。允矣在高明之室。神罔時怨。愴然聞歎息之聲。謹啓。

銘補遺

北極出地四十度。加節氣平晷銘。井說。晷畫於圓扇。

扇平持。柄向北。后柄底。羸丁出銅表。取表插孔中。視表尖影所指。在某節綫。卽得某時綫。某刻綫。蓋節綫與時綫相經緯。而南北自正。故不用南鍼。

平規置塾。識景曠也。綫節綫時。互經緯也。經緯正矣。鍼蠟肥也。極出地表。表所旣也。朔高南下。一侯尉也。用四十度。丁象魏也。蓋實通渾。西法彙也。執扇寫圓。涎且穢也。手揮日光。時熏颺也。

龍泉寺檢書圖記附錄

歛縣少司農師程公既卒之明月。儀徵相國師阮公約同人集龍泉寺。檢其遺書。先一日基以告於公之孤德威。德威泣而言曰。先公於辨論經史六書古義及天文地志。札記最夥。詩古文詞亦爲之甚勤。顧不自存省。其僅未散失者。櫛置書篋中。往往無首尾題識。它日從容整理。稍就次第。當乞阮公鑒定。今苦由迫促未遑也。願辱公及諸君子存錄之盛心。不可以負。有戰國策地名考二十卷。遂寫粗畢矣。德威斬焉衰經。不敢躬詣。明日將挽宗人鎮北先生持正於阮公。同人既集。鎮北持書來。公披釋久之。歎曰。疵類有未滌者。然既博且精矣。聞尙無副墨本。余雖欲爲審訂。未忍遽攜持去。屬鎮北還於其孤。且謂曰。諸君其急爲校讐。使無遺憾。余雖老。幸及爲覆眎而弁言以行。胡朏明禹貢錐指。全謝山地理志稽疑。後此其盛業矣。並其它著作。當成大集。司農其可以不朽。烏乎。京師才士之藪。魁儒碩生。究樸學。能文章者。輻湊鱗比。日至有聞。至於網羅六藝。貫弗百家。又巍然有聲名位業。使天下士歸之。如星戴斗。如水赴海。在於今日。惟儀徵及司農兩公而已。然儀徵以文章經術。受三朝殊遇。歿歷封圻。入躋宰輔。儒生勳績。彪炳人寰。司農繼先公蘭翹學士後。兩世入直書房。督學典試。頻膺使命。嚮用甫殷。迄未足以行其志。儀徵公所著研經室集。十三經校勘記等書。手付劖劂。又刻宋本十三經注疏。皇清經解諸巨冊。普惠天下學者。司農則詩文各種。既未寫定。卽此二十卷成書。亦未知付棗何日。儀徵公久得末疾。日有歸志。承學之士。謂京

師中儒林祭酒。繼儀徵者惟司農。乃司農年不中壽。偶攫涇疾。遽歸道山。儀徵公年踰七旬。神明不衰。且勤勤焉。檢其遺書。流連而太息之。噫。資秉之異。學術之大。精神意量。包涵斟酌之闕。且遠。司農視儀徵。亦幾如驂之靳矣。信屈殊勢。豐嗇殊形。脩短異數。如其不相侔也。豈非天哉。豈非天哉。儀徵少年通籍。蚤負隆譽。由乾隆至道光。六十年閒。海內覃經講學之儒。皆其先後所師友。或其門下士。或其再傳弟子。司農之起。後二十餘年。乾隆時老師宿儒。未及見者已多矣。然基久處京師。所及交。若劉丈申甫、潘丈少白、陳丈碩士、陳秋舫、龔璠人、魏默深、陳碩甫、江鐵君、徐廉峯、管異之、陳東之、徐君青、鄭浣香、俞理初、羅茗香、汪孟慈、陳頌南、張彥惟、許印林、張石州、沈子敦、黃蓉石諸君。大抵皆兩公所識習而矜賞者也。基自爲弟子員。出司農之門。及成進士。改庶常。儀徵公實爲館師。兩公居相鄰。其與璠人孟慈頌南諸君。過從游侍。蹤跡輒相屬。今司農已矣。儀徵旣告歸邗。上文選一樓。如靈光魯殿。因念基所及交諸君者。前後數十輩。或旣逝且老。其尙未至於此者。或浮沈郎署。或留滯公車。或汎濫江湖。如有箸述。早付殺青。天時人事。茫茫汗汗。知誰爲後死。當檢其遺書者哉。讀斯圖。不禁爲吾師雪涕向天。深悲之而復幸之也。道州門人何紹基謹記。

程侍郎遺集跋

右程侍郎遺稿十卷。國朝程恩澤撰。案侍郎幼承家學。夙荷主知。簪筆木天。趨翔廊閣。讀書萬卷。下筆千言。著撰等身。文章名世。洵一代龍門也。而虛懷友士。折節下交。見一善則盱衡扼腕。遇一才則揚眉抵掌。宜其望隆山斗。獨步當時。屢掌文衡。翕然相度。乃嚮用方殷。玉樓竟召。八百孤寒。齊下感恩之涕矣。文兼燕許之長。而凝重學柳。詩擅杜韓之勝。而豪宕似蘇。亦中朝之宿老。而曠代逸材也。集經張石州明經編輯。欲不遺一字。故失題及不完之作。並采以待後來補入也。余夙喜侍郎之詩。舊從友人錄得廿餘首。未見集中。今擬重付剞劂。並編入焉。而失題及不完之作。則概從芟薙。以待後來。至律賦及試帖詩。多已刻於同館賦鈔詩鈔者。未免綴旒。似可不存也。明經序稱其精神所到。卓絕岸異。必然可傳於後者。則其有韻之詩文也。殆非過爲推挹之言。又稱其自言吾詩險而不夷。能飛揚而不能黯淡。亦可謂得失寸心知者矣。阮氏瀛舟筆談。稱其詩儻然遠俗。清介可風。寒江云。月從京口白。天入海門青。錦瑟云。綠尊槐葉窺。紅袖棗花簾。寒山云。石根齊到地。風力自生潮。趙北口云。魚聲在水都成雨。帆影依天欲化雲。又云。傍柳人家春放鴨。落花時節女湔裙。詩多不見集中。則其遺佚者不少矣。明經又疑其尚有清本。藏之別笥。何迄今未見也。噫。可慨已。咸豐乙卯花朝後四日。清明。南海伍崇曜謹跋。